

孫文垣醫案

中

中國醫學大成第十一集

醫案類

孫文垣醫案中

上海大東書局印行

# 孫文垣醫案

明 新安 孫一奎文垣甫輯

鄞縣 曹赤電炳章圈點

## 卷二

### 二二吳治驗

王文川令郎。原傷飲食。又傷於冷菱等物。遍身發黃。眼如金色。夜發熱。天明則退。腹痛手不可近。號叫通宵。市醫因其黃而曰胡苗真矣。衆議以草頭藥進。予至急止之。曰。向以草藥幾誤其母。復欲誤其子乎。蓋脾胃喜溫惡寒。且此症乃食積釀成。而黃爲濕熱所致。法當健脾。用溫暖之劑下之。濕熱去而黃自退。草頭藥性多寒。用之是損脾土。而益其疾也。可用哉。卽以保和丸一錢。入備急丸五分。作一次服之。少頃瀉一次。又少頃連下三次。積物所下甚多。腹痛盡止。再與調中丸服一月。不但一身之黃盡退。而步履輕捷如飛。其父喜曰。神不誤我。問

其故曰。始議進草頭藥者十九。而孫君獨叱其非。余不能決。而決於神。神允孫君。服果有效。而吳我峰小樓等曰。亦孫君之藥神爾。設無孫君。神雖靈。何所顯哉。衆拊掌而噱。

施涇陽先生內人。年五十八。左脅有痰飲。每升至咽間。卽脹悶。不知人事。遍身皆脹。不能臥。小水赤。診其脈。兩寸關洪滑。六部皆數。予謂此痰火症也。痰生熱。熱生風。故每發人事不知。爾乃與牛黃清心涼膈丸。同黑虎丹。服之。夜遂得睡。人事亦安靜。再以二陳湯。加滑石。竹茹。鬱金。薄荷。黃芩。前胡。加燈心。生薑。煎服。全安矣。

屠侍軒尊眷。產一日而觸於怒。大便洩瀉。昏憤不省人事。大熱氣促。汗多。衆醫謂產後脈不宜大。今脈大而左手且散亂。又汗出喘促。法在不治。予曰。固然。晝云。醫而不起者有矣。未有不藥而起者也。且不藥而視其死。與藥而或可圖生者。孰優。予試之。亟與人參五錢。白朮三錢。炙甘草一錢五分。炮薑二錢。肉果六分。五味子七分。煎服。其夜遂稍睡。予竊喜。補而得睡。其陰陽和矣。次早脈果稍收。斂。喘促亦緩。大便前半夜瀉三次。五更啜粥半盂。小便通利。大有生意也。再以

人參、阿膠固元氣。定喘爲君。白朮、炮薑補脾爲臣。澤蘭、蕪菁退產後之熱。五味子、斂神止汗。肉果止瀉爲佐。甘草和中爲使。五帖而安。

屠學恆先生乃眷。以產後欠補養。而精神疲困。脾胃亦弱。腹中間作痛。作瀉。脈兩手皆濡軟無力。以六君子湯加藿香、砂仁、香附、蒼朮、澤瀉調理而安。

周鑑泉令政。病傷寒發熱。譫語口渴。咳嗽。胸膈痛。洩瀉嘔吐。遍身發斑。診之六脈洪滑。予曰。此少陽陽明合病之症。勢亦重矣。急以升麻葛根湯加滑石、五味子進之。服後汗大出。下午卽退涼。而譫語止。晚進柴芩湯加五味子、滑石。其夜瀉止。神思始清。次日左脈已和。右脈亦稍收斂。予喜曰。可無恙也。改用白芍藥爲君。陳皮、柴胡、酒芩、五味子、牡蠣、滑石、茯苓、澤瀉、白朮。服四帖而瘥可。

大國博臧顧渚先生。病由耳揪痒。脣燥舌乾。咳嗽吐濃痰。脈左稍浮弦。右洪滑。此胃中痰火流入肺經。鬱積久而生熱生風也。先以總管丸導其痰。又與黑虎丹祛其風熱。繼以天花粉、薄荷、鬱金、葛根、白藥子、甘草、黃連、連翹、蟬退煎服而安。王南崗咳嗽氣湧不能伏枕。吐痰不已。下午微熱。胸膈膨脹。不知飽餓。口乾舌上白胎厚。小水短少。大便裏急後重。間有紫黑血。脈右關洪滑。左手濇。據脈症胃

中有瘀血痰積。而肺氣亦虛也。法當先補而後瀉。以人參、白朮、白芍藥、柴胡、黃連、陳皮、半夏、五味子、桔梗。與三帖後。察其肺脈已旺。乃與總管丸下之。去黑血屑極多。諸症悉減。再與紅六神丸調理而痊。

張桃津乃政。原有小便癱閉之症。又小產後三日。臍下作疼。夜分發熱。口渴。大便溏。日三四度。先與補中益氣湯。加玄胡索、澤蘭葉、牡丹皮服之。連進三帖。大便秘實矣。惟小便頻數。滴滴不斷。一日夜二十餘次。夜分尤多。精神甚憊。脈雖五至。不甚充指。此血虛有熱。而氣亦滯也。濕熱在氣分。故口中渴。血虛。故臍下痛。法當峻補其陰。而淡滲其陽。以熟地、黃三錢、黃柏一錢補陰為君。草薢去濕熱為臣。瞿麥、穗、澤瀉、淡滲為佐。烏藥調氣。甘草為使。服下。臍痛全止。小便其夜亦不起。連進三帖。病脫然矣。

陳光祿松巒翁。長厚君子也。而存心博愛。常五更胸膈脹疼。三吳名家遍延而治。寒熱溫涼藥味備嘗。竟無一効。禮予診之。右寸軟弱。左平。兩尺亦弱。予曰。此肺腎二經之不足也。補而斂之。可無恙矣。以補骨脂、山茱萸、人參各三兩。鹿角膠、鹿角霜各五兩。杜仲、巴戟、白茯苓、車前子各一兩五錢。乾山藥二兩。鹿角膠酒

化爲丸。空心淡鹽湯送下。又以御米殼去筋膜蜜水炒三兩。訶子麵煨去核一兩。陳皮一兩半。煉蜜爲丸。五更枕上白湯送下一錢。服一月。病不再發。翁由是交予極驩也。及見予玄珠稿大稱快。語曰。醫家凡得一方。輒自秘以爲高。君獨欲公諸人。是有意於壽蒼生者。亟付剞劂。予當助梓。因手錄予百餘方。製丸散以施。而亦無人德我之望。

溧水令君吳湧瀾公尊夫人。每五更倒飽。必瀉一次。腹常作脹。間亦痛。脈兩手寸關洪滑。兩尺沉伏。予曰。此腸胃中有食積痰飲也。乃與總管丸三錢。生薑湯送下。大便雖行。不甚順利。又以神授香連丸和之。外用滑石、甘草、木香、枳殼、山查、陳皮、白芍藥、酒連。調理而安。

李悅齋先生夫人胸脇大腹作疼。謔語如狂。寅卯辰三時稍輕。午後及夜痛甚。晝夜不睡。飲食不進者十八日。究其故。原有痰火。與頭疼牙疼之疾。又因經行三日。後頭疼發寒熱。醫以瘧治。因大惡熱。三四人交扇之。而兩手浸冷水中。口噤水而不嚥。鼻有微衄。又常自悲自哭。目以多哭而腫痛。時卽壁上。亦欲飛去。劇則咬人。小水直下不固。喉梗梗吞藥不下。脈則左絃數。右關洪滑。予曰。此熱入

血室症也。誤服治瘧剛燥之劑。而動痰火。以致標本交作。諸人猶謂熱入血室。當夜間譫語。如狂如見鬼。何至胸脇疼劇咬人也。予曰。仲景云。經水適來。適止。得疾。皆作熱入血室治之。治同少陽。而以小柴胡湯爲主。加涼血活血之藥。此古人成法。可守也。痛極咬人者。乃胃虛蟲行求食而不得。故喉中梗梗然也。卽以小柴胡湯。加桃仁。丹皮。而譫語減。次日以安虵湯與服。而疼隨止。飲食進。遂駸駸有生意。

吳仲峰先生。邀予診時。爲仲秋初二日也。六部皆沉微。而左尤甚。隱隱如珠絲之細。症則原以腸風去血。過服寒涼。致傷脾胃。自春至秋。脾洩不愈。日夜十二三行。面色黃白帶青。兩頤浮腫。四肢亦浮。小水不能獨利。利必與大便並行。腸鳴。四肢冷。口不渴。飲食大減。口脣齮肉皆白。其爲人也多憂思。夫四肢者。脾之所主。清冷爲陽氣不充。兩頤乃腎經部位。浮腫。益見腎氣之不足也。脈沉微。與面色黃腫。皆屬於濕。書云。諸濕腫滿。皆屬脾土。合脈症觀之。由脾虛不運。積濕而然。虛寒明矣。病至此。勢亦甚危。第形症相符。色脈相應。又能受補。庶幾可生也。法當大溫補升提。以東垣益胃升陽滲濕湯。加減調理。人參三錢。白朮五錢。黃



耆二錢。茯苓、益智仁、蒼朮、澤瀉各一錢。大附子五分。炮薑、炙甘草、升麻、防風各五分。連服八帖。諸症悉減。乃囑之曰。病雖暫愈。宜戒生冷憂思。庶服藥有效。切勿輕犯。犯之非藥石可回也。翁曰諾。敢不唯命。

張後溪先生令孫。遍身瘡疥浮腫。腫自足背起。漸腫上大腿。今且至腹。大便洩瀉。發熱不得安寢。此風濕之症。當令與時違之候。治從開鬼門。潔淨府二法。使清陽升則瀉可止。小水利則浮腫可消。上下分去其濕之意也。蒼朮一錢。薏苡仁、桑白皮各三錢。青蒿、防風、升麻、柴胡各五錢。大腹皮、五加皮、赤茯苓、澤瀉各六分。入帖全安。

府佐張五橋先生夫人。患喘嗽。夜分氣壅不能仰臥。體素弱。脈右滑大。左細弱。每咳嗽必連連數十聲。痰不易出。甚至作吐。以東垣人參平肺散加減治之。四日而愈。人參、桑白皮、地骨皮、青皮、茯苓、五味子、知母、滑石、麥芽、天麻、粳米、甘草水煎服。夜與白丸子。

方東埜患脊骨痛。牽引胸腹皆疼。舌上黃胎甚厚。脈沉滑而數。先與川芎、羌活、炙甘草、蒼朮、薑黃、防風、藁本、枳殼、桔梗、柴胡服之。服後背脊痛減。腹仍痛。與木香、

檳榔、薑黃、香附、青皮、酒連、大瓜、蔓、柴胡、川芎服之。腹痛稍減。腰疼甚。知其痰積下行。欲去而不能也。卽以木香、檳榔丸下之。連行三四次。舌上黃胎始退。腹痛全止。脈亦軟弱。改以人參、當歸、白芍、甘草、茯苓、陳皮、白芥子、香附、柴胡、青皮、白朮調理而安。

張淨宇文學發熱。腹疼洩瀉。口渴。嘔吐不止。時師有認寒者。有認熱者。有認傷食者。予至診之。曰。此時疫瀉也。以二陳湯。倍白朮。加青蒿、葛根、酒芩、白芍藥、豬苓、澤瀉、滑石。一劑而安。

張一尹近川翁。始以內傷外感。過服發散消導之劑。致胃脘當心而痛。六脈皆絃而弱。此法當補而斂之也。白芍藥、酒炒五錢。炙甘草三錢。桂枝一錢半。香附一錢。大棗三枚。飴糖一合。煎服一帖而瘳。

閔文川先生。肛上生一腫毒。月餘膿潰矣。但稍動則出鮮血不止。大便結燥。胸膈飽脹。飲食不思。脈兩寸短弱。關絃尺洪滑。此氣虛血熱陷於下部。法宜補而升提也者。不然痔漏將作。可慮也。黃耆二錢。歸身、地榆、槐花、枳殼各二錢。升麻、秦芫各七分。荆芥穗五分。甘草三分。服後胸膈寬。惟口苦甚。前方加酒連、連翹各

五分而愈。

李古愚先生。每食後卽大便。腹皮稍脹急。胸膈飽悶。醫與參朮。則痞悶愈甚。小水清而長。予脈之。左寸濇。右寸滑。按之如黃豆大。且鼓指。關尺之脈皆絃小。左尺脈迢迢有神氣。據脈乃積痰鬱滯於肺。莫能出。以致大便之氣不固也。法當效丹溪治。乃叔用吐。吐去上焦痰積。而大便自實矣。先用苦梗、蘿蔔子各三錢。白豆仁、橘紅、山梔仁各一錢。川芎五分。生薑三片。葱三根。水煎服之。取吐。服後半時許。惡心。吐出清痰。心惡之勢雖有。乃痰積膠固。猶不易出。又以蘿蔔子一合。搗漿水。加蜂蜜與半碗。飲之。始吐出膠痰二碗餘。平日每小水。則大便並行。吐後。小水始能獨利。連行三四次。而胸腹寬舒。初亦以吐爲懼。至是豁然稱快。大便五日不行。始以予言爲不謬也。再以二陳湯。加白朮、旋覆花、麥芽。調理而全可矣。

姚惠齋先生。夜多洩瀉。瀉必三五次。甚且十數次。小腹時作疼。按亦疼。口不渴。小便長。醫半年不愈。予診之。左寸滑。餘五部皆濡弱。此陽氣大虛。虛中有寒也。治當溫補下元。兼之升舉。人參一錢半。黃耆、白朮各二錢。白芍藥、酒炒三錢。大附

子五分。肉桂一錢。杜仲補骨脂各一錢半。升麻防風各七分。薑棗煎服。其夜大便減半。次早雖瀉。俱是白積。如生豆汁狀。小腹痛止。再診之。右脈稍起。連服四帖而瘳。翁喜言曰。抱病半年。藥無虛日。今收功於四劑。何禎哉。認病真而投劑。確也。敢不銘心。

大京兆姚畫老夫人。年幾七十。右手疼不能上頭。醫者皆以痛風治。不效。益加口渴煩燥。請予診之。右手脈浮滑。左平。予謂此濕痰生熱。熱生風也。治宜化痰清熱。兼流動經絡。可瘳也。二陳湯倍加葳靈仙酒芩白殭蠶秦艽四劑。而病去如脫。

一僕發熱頭疼。口渴腹疼。小便赤。大便瀉。日夜不睡者六日。予診之曰。據脈汗後浮數。熱尚不減。乃疫症也。以滑石三錢。青蒿葛根白芷片芩各一錢半。炙甘草升麻各五分。一帖卽得睡。熱減大半。頭痛全除。惟小水赤頭暈。脚膝無力。此病後血虛之故。以四物湯加青蒿酒芩薏苡仁服之而安。

一僕病與前類。而身如火爍。頭痛如破。大便不瀉。小水赤。口渴鼻乾。不得眠。胸膈膨脹。腹飢不能食。六脈弦而數。用竹葉石膏湯加知母枳殼白芷葛根。大加青

蒿一帖而熱痛減半。胸膈亦寬。惟口渴。渴小水短濇。睡臥不安。又與化瘟丹三錢。井水化下。渴止。稍得睡頭暈脚軟喘急。與四物湯加青蒿酒芩薏苡仁木瓜服之全安。

一僕之病亦與前相似。以服丘一齋藥而大吐大瀉。熱益增。頭痛莫能當。煩躁口渴。鼻乾嘔吐小水短濇。寢食廢者十四日。勢甚危急。詢前所服藥。乃藿香正氣散加砂仁厚朴山查大耗元氣之味。且五月火令當權之疫。當以甘寒之劑治之。何可以辛熱香竄者。益其火而枯其津也。其勢危矣。此皆不知因時達變。惟習常膠故以誤人者。用急投人參白虎湯加竹茹葛根青蒿升麻一帖而熱除。再帖而頭痛止。諸症盡去。後連治數人。多如此類何也。此天行之疫。故一方見之。治多先以甘寒清解之劑。投之熱退。卽以四物湯以補陰血。稍加清熱劑。而青蒿之功居多。此固一時自得之愚。用錄之以告同志者。使知治法。當隨時俗爲變。而常套人可不脫也。

馬鳳陽文學。五月患咳嗽內熱。額上多汗惡風。脈左絃數。右滑數。予曰。據絃數爲陰虛。滑爲有痰。不亟調治。恐成虛怯。以白芍藥川歸茯苓五味子白朮甘草陳

皮、貝母、天花粉、酒芩、麥冬、知母、桑白皮、十帖。諸症皆瘳。七月復瘧。間日一發。寒熱相半。寒熱亦俱極。渴甚。上身汗多。以石膏五錢、人參、黃耆、白芍藥、麥冬、知母各二錢、柴胡三錢、桂枝、甘草、陳皮、貝母各一錢、竹葉三十片、一帖而愈。

倪二南先生內人。小水不禁。一日二十餘起。脈右寸洪而有力。左寸虛。右尺沉微。此心腎不交之症也。以當歸、遠志、丹參、牡丹皮、桑螵蛸、人參、山茱萸、益智仁、黃柏、知母爲丸服之。五日而安。後凡遇辛苦則發。以此服之立效。

柱史嚴印老長媳。少司空沈鏡老女也。患腹痛有小塊。藹藹然。腹覺冷甚。兩寸關皆滑數。兩尺皆沉微。此脾氣弱而飲食不消。又當秋令濕淫之候。不利亦瀉。宜預防。與白朮、蒼朮、茯苓、甘草、白豆仁、木香、半夏、陳皮、澤瀉煎服。其夜果瀉一度。次早又瀉一度。小腹仍疼不少減。且裏急後重。蓋其稟賦素虛。當補中兼消兼利。白芍藥三錢、桂心一兩、甘草、人參、茯苓、澤瀉、陳皮、白朮各八分、升麻、葛根各六分。服後。脈皆軟弱不滑。藹塊亦消。改以人參、黃耆、白朮、白芍藥各二錢、炙甘草、陳皮、澤瀉、葛根、柴胡、茯苓各一錢。調理而瘳。

新市陳鹿塘先生。原有腸風臟毒之症。大便燥結。數日不能一行。痛苦殊甚。此胃

寒腸熱之症。其脈兩寸皆數。兩關皆弦而無力。兩尺洪滑。而左尤甚。診畢。渠告予曰。病數年。百醫不效。望生難矣。聞公治多奇中。冀一奇而生之。實再造之恩也。予憐其苦。而俛想久之。因思李東垣有云。大腸喜清而惡熱。脾胃喜溫而惡寒。以胃屬土。而大腸屬金也。今治腸胃相兼之疾。必寒非淒淒。熱非灼灼。始可。乃詳酌一方。專以腸風臟毒之藥爲君主。外以養血之劑。使之不傷胃氣。蓋藥先入胃。而方傳入大腸。入胃時。裏藥未化。及入大腸。則裏藥化。而君藥始見。庶幾兩不相妨。亦假道滅虜之策也。因以大黃酒浸九蒸九晒者二兩。槐花三兩。木耳二兩。郁李仁。皂角子。象牙屑。條芩各一兩。血餘灰。升麻。荆芥穗各五錢。爲末。煉蜜爲丸。赤豆大。外以四物湯。加蒲黃各一兩爲衣。米湯送下。空心及下午。各服二錢。服此。果然血止。而大便不燥。飲食日加。鹿塘大喜曰。古稱用藥如用兵。奇正相生。鮮有不克敵者。其公之謂乎。

張道南先生內人。以飲食忤於氣。因腹痛不飲食五日矣。逆予診之。兩寸關弦。尺滑。予曰。此上焦氣虛。下有鬱滯也。以薑黃。青皮爲君。山查。檳榔。當歸。杏仁。烏藥。枳殼爲臣。柴胡。木香爲佐。吳茱萸爲使。服後氣稍順。然後用葱二斤。煎湯浴洗。

腰腹。卽將熟葱擦摩腰腹。使氣通透。洗畢卽安臥。少頃。其夜大便秘。先下皆黑硬結塊。後皆水。此積滯行而正氣虛也。以建中湯加山查、茯苓、澤瀉、柴胡、香附、薑、連、調攝之而痊。

張道南先生尊堂老夫人。以勞倦致早晨膈上有痰痞而惡心。每食熱物。目中卽出泪。脈右寸關皆滑。左寸短弱。此心血不足。而肺胃有痰也。以六君子湯加麥芽、白豆仁、旋覆化。治之而愈。

馬迪庵先生內人。原以飲食過傷。又爲風寒外襲。以內傷外感治之。後復至五更發熱。脣燥。胸中衝跳不已。手足皆冷。脈兩寸俱滑數。予謂此奇痰症也。以小陷胸湯加白芍藥、蘿蔔子、前胡、酒芩二帖。次早大便秘。下虵蟲八條。胸中卽不衝跳。但覺力怯。再診之。兩寸減半。尺脈稍起。以二陳湯加白朮、白芍藥、酒芩調理。後四帖。加當歸而全愈。

大宗伯董潯老夫人。常眩暈。手指及肢節作脹。脈右寸軟弱。關滑。左脈弦長。直上魚際。兩尺皆弱。此亢而不下之脈。難經所謂木行乘金之候也。總由未生育而肝經之血未破。爾內經云。諸風掉眩。皆屬肝木。兼有痰火。治當養金平木培土。



化痰。以白朮半夏麻湯。正與此對。服兩帖而眩暈平。再與六君子湯。加天麻、白僵蠶以治其暈。加白芍藥以瀉肝。麥門冬、人參以補肺金。麥芽、枳實、神麩、蒼朮以健脾。使宿痰去而新痰不生。少用黃柏二分爲使。引熱下行。令不再發。張裕齋惡寒痰多作呃。胸膈不寬。兩寸俱短弱。關洪大。尺濇。此上焦氣虛。中焦有痰。下元不實也。法當清中補下。不然。後將有中風之患。二陳湯加白豆仁、香附、藿香以開胃氣。白芥子、蘿蔔子、杏仁以降痰而潤大便。兩帖諸症悉去。乃錄入味腎氣丸方與之。令自調理。

大柱史巖印臺夫人。年近六十。已孀居十年餘。以孀居而食長素。其壻張懷赤善予語。曰。外母近鼻塞。大便瀉。胸膈不暢。醫者下之。益甚。予曰。王海藏有云。雜病酒積下之早。必成痞滿。所當慎也。用拉予診之。兩寸沉弱。關弦大。兩尺亦弱。予曰。此陽氣甚弱。脾氣大虛。不當下而誤下之。故鼻作塞。而胸痞悶也。用蒼朮、川芎、桂枝、白芷、防風、桔梗以疎風而升陽氣。白豆仁、蘿蔔子寬胸利膈。麥芽以助脾氣。服後鼻不塞而胸猶痞。復用東垣木香化滯湯。加吳茱萸、乾薑而安。乃囑之曰。病雖漸愈。第陽氣虛。脾氣弱。不宜久食素。恐中氣不充。防作中滿。謹識之。

謹識之。

王谷泉大便作瀉。上身熱。耳中壅塞。頭眩暈。胸膈不寬。口渴。痰多咳嗽。六脈俱濡弱。汗大出。此正氣大虛。或由尅伐太過所致。當以補養爲先。人參、白朮、白芍藥、酒炒各四錢。柴胡、石菖蒲、陳皮各一錢。炙甘草五分。澤瀉、茯苓各一錢。兩服而神清膈寬脾健。惟汗不斂。眩暈未除。再與人參、白朮、黃耆、酒炒白芍藥各二錢。炙甘草五分。大附子五分。桂枝三分。澤瀉一錢而愈。

方東埜兩脅痛。上壅至胸。發熱。飲食不進。脈左手沉而弦數。乃積氣也。右手滑。痰飲也。關脈濡弱。脾氣不充也。據症或觸於怒。故痛之暴耳。治當先去積熱。消痰氣。然後用補。瓜蒌仁六錢。枳殼、薑連、半夏各一錢半。白芥子一錢。牡蠣二錢。炙甘草五分。柴胡一錢五分。二帖。諸症盡去。飲食進矣。然恐其復發也。與當歸龍會丸使行之。以刈其根。服下果行二次。

一婦人懷妊七月。內熱咳嗽。胸膈飽悶。以條芩二錢。瓜蒌仁、白芍藥、紫苑、貝母、桑白皮各一錢。甘草三分。枳殼、紫蘇梗、知母、陳皮各七分。二帖而愈。

一婦人心痛脣紅。痛則大發熱。頭疼少頃出汗。脈大小不一。予曰。此蟲痛之症。痛

吐白沫、可徵也。檳榔、川椒各二錢。杏仁一錢五分。石菖蒲一錢。烏梅七個。炮薑、草豆仁、陳皮各五分。山梔仁一錢。一進而痛減半。再進而痛全除。

倪二南內人小產後。小腹痛。夜分作熱作暈。予曰。此氣血虛而惡露未盡也。川芎一錢半。當歸三錢。澤蘭、益母草、香附、丹參各一錢。人參七分。荆芥穗五分。山查、桂皮各一錢。一帖而小腹痛止。再帖而熱暈悉除。

倪少南右頰車浮腫而疼。直衝太陽。大發寒熱。兩手寸關俱洪。大有力。此陽明經風熱交扇所致。以軟石膏三錢。白芷、升麻各一錢。葛根二錢。生熟甘草一錢。薄荷、山梔子、牡丹皮、連翹各七分。天花粉、貫衆各一錢半。兩帖。腫痛全消。

倪少南內人。經行如崩。勢不可遏。頭暈眼花。脈右寸極軟弱。左近駛。此氣虛血熱之候。由氣虛而血不固也。仲景云。血脫益氣。特用人參、黃耆各三錢。白朮二錢。粉草五分。荆芥穗、蒲黃、側柏葉、薑炭各一錢。三帖全瘳。

高仰山內人。痔血裏急後重。飲食入腹。大便即行。晝夜行五六度。五更咳嗽。喉中痰響。肌肉脫口作渴。由服痔科涼血之藥過多。致脾虛不能統血也。脈六部皆軟弱無力。以四君子湯。加荆芥穗、秦艽、陳皮、炮薑四帖。而飲食進。血全止。嗽定。

而睡寧。後減炮薑。倍加何首烏。又四帖而數年不發矣。

姚娘子小腹痛。飲食及藥入腹皆疼。疼來遍身無力。此由血崩而致。宜急治之。人參、黃耆各二錢。白朮一錢。茯苓、陳皮各八分。白芍藥、貫衆各一錢。薑炭、荊芥穗、蓮蓬殼、燒灰各三分。煎服而安。

張五橋先生令政。鄭部諫春寰公令姊也。痰喘不能伏枕。且咳嗽。甚則吐痰涎。碗餘乃止。以旋覆花湯爲主治之。旋覆花、紫蘇子各一錢。半夏一錢五分。厚朴、桂皮、粉草各三分。茯苓、陳皮、桑白皮、葶藶子各八分。薑三片。水煎服。臨臥以養正丹二十粒。白湯送下。兩帖。痰嗽喘各減十之七。乃去葶藶子。加白芥子、蘿蔔子。二帖而痊。

徐文學三泉先生令郎。每下午發熱。直至天明。夜熱更甚。右脇脹痛。咳嗽弔疼。坐臥俱疼。醫以瘧治罔效。延及二十餘日。熱不能退。後醫謂爲虛熱。投以參朮爲主。痛益增。逆予診之。左弦大。右滑大。搏指。予曰。內經云。左右者。陰陽之道路。據脈。肝膽之火爲痰所凝。必勉強作文。過思不決。木火之性。不得通達。鬱而爲疼。夜甚者。肝邪實也。初治。只當通調肝氣。一劑可瘳。誤以爲瘧。燥動其火。補以參

虛。閉塞其氣。書云。體若燔炭。汗出而散。今汗不出。舌上之胎已沉香色。熱之極矣。設不急治。立見凶危。乃以仲景小陷胸湯爲主。大瓜蒌一兩。黃連三錢。半夏。二錢。前胡。青皮各一錢。水煎飲之。夜服當歸龍會丸。微下之。諸公猶爭之曰。病久而食不進。精神狼狽若此。寧可下乎。予曰。經云。肝常有餘。且脈亦爲有餘。故有餘者瀉之。前時誤認爲虛。投補左矣。豈容再誤哉。服後夜半痛止。熱退。兩帖全安。

王祖泉乃眷。朝飯後。稍寒。惡風發熱。遍身疼痛。汗大出不止。口中熱。腹中不知餓。小水短。六脈皆瀯。以白芍藥五錢。白朮二錢。桂皮。黃芩各一錢。甘草八分。二帖而汗止。寒熱除。減去白朮。加當歸。而遍身痛止。

費少垣乃眷。姪已九月。痰多喘嗽。胎氣上逆。眼撩不起。兩太陽微疼。予曰。此子懸症。兼痰火也。以大紫蘇飲爲主。纔服一帖。逆卽不逆。胸膈頓寬。惟喘嗽不止。與七製化痰丸而安。

費一吾先生令政。娠已四月。夜不能睡。小便淋痛。痰嗽內熱。脈右關滑。左寸微弱。兩手皆數。與橘紅。貝母。片苓。黃連。茯苓。澤瀉。枳殼。蘇梗。前胡。水煎服之。其夜卽

能安寢。次日再以四君子湯加當歸、香附、貝母、陳皮、條芩、紫蘇梗、前胡調理。足月而產一子。

令弟媳六娘子遍身痛發熱汗大出昏昏如醉臥不能起兩寸脈短弱兩手背數而無力此勞倦之餘故汗大走也黃耆三錢白芍四錢粉草一錢五分桂皮八分當歸一錢石斛二錢一帖熱除痛汗皆止惟倦而不能起仍以前方加人參陳皮兩帖而痊。

又八娘子頭痛咳嗽痰多有血夜分發熱喉中常作血腥每經水行必腹中先痛二日用香附牡丹皮滑石甘草桃仁川芎當歸柴胡白芍山梔子茅根入帖而瘳。

姚弁山老先生內人自上年十月左足不能履地至十二月產後忽好三日復不能動時常胸脇作痛素多痰火而治者年以四物湯天麥門冬爲主間服獨參湯服將彌年而病如故予診之兩寸脈俱洪滑而數夜分發熱此係濕痰凝滯補塞太重故遷延不脫乃以二陳湯加蒼朮黃柏葳靈仙五加皮生地黃白芥子白芍藥當歸兩帖胸膈痛止熱除再加薏苡仁入帖而足能舉步矣。

李坦渠老先生令子室。十月發寒熱起。一日一發。咳嗽心痛。腰亦痛。至次年正月十七日。始間日一發。肌肉大瘦。喉疼。汗出如雨。白帶如注。飲食減少。百試而汗不止。延予爲診。其脈右手軟弱。左手散亂。此汗多而脈不斂。病勢至此。危之甚矣。書云。火熱似瘧。此病之謂歟。以黃耆二錢。白芍一錢五分。粉草。阿膠各一錢。鼈甲三錢。桂枝五分。烏梅一個。水煎服。其夜汗止。次早診之。左脈已斂。神氣亦回。前方加何首烏。石斛。牡蠣。其日寒熱亦不發。飲食稍加。駸駸然有幽谷回春之象。

太學周衡宇先生。吳江瀾溪人。大家宰白川公之令孫也。近來咯血色紫。胃中痰火素盛。壅於胸鬲。作痞作疼。痰與瘀血挾而爲熱。脈左寸洪大。右寸關皆滑。兩手盡數。此有餘之候。總管丸四錢。再以滑石。桃仁各三錢。山查二錢。枳殼。梔子。貝母。紅花。丹皮各一錢。茅根五錢。水煎服之。次日大便行三次。痰積極多。內帶瘀血。改以山梔子。紫苑。丹皮各一錢。滑石三錢。桃仁一錢五分。小薊三錢。茅根五錢。水煎。加童便一酒盃。三帖全安。

大參張公分守杭嘉湖道。因喪夫人。衙中亡者八口。心中惶。又因凌繹翁交厚。而

禮子爲診。左寸脈短。關弦。右關滑。兩尺亦弦。據脈。心血不足。中焦有痰。流於下部。凝於經絡。以故腰膝痠疼。居常背心作脹。頭多眩暈。夜睡多汗。先時諸醫悉投風劑。非所宜也。予以陳皮、白芍藥、木瓜、牛膝、五加皮、苡仁、黃柏、酒芩、甘草、生地、當歸、葳靈仙、調理十劑。諸症悉愈。

大都諫鄭春實老先生。爲春元時。頭痛內熱。入夜尤甚。汗出如流。通宵不止。小水短赤。舌上黃胎。右脅脹疼。先與桂枝白虎湯一帖。解其內熱。斂去浮汗。再與白芥子一錢。瓜蒞仁四錢。枳實、薑黃、黃連各八分。水煎服。外與當歸龍會丸一錢五分下之。而脅痛安。

大參徐天目老夫人。胸膈痞悶。不思飲食。咳嗽多痰。或時惡心。上焦頭目俱不清利。向來長素。兩寸關滑大如豆。兩尺沉微。痰火症也。二陳湯加酒芩、薄荷、前胡、枳殼、蒼朮、香附、鬱金、川芎。調理而安。

張麗川咳嗽多痰。面青潮熱。肌瘦性躁。而多自用。以數考不利。悒悒成疾。又新婚之後。飲食不節。脈之。右關滑大。餘部皆無神氣。且糞門已發癰瘡。潰流膿血。予曰。此陽病極而下也。法在不治。果不逾月而亡。



陳仰山先生內人。小產後二月。而血大下。白沫如注。五更洩瀉。面虛浮。下午身熱。口渴。面色青黃。脈右手大豁近芤。左濡弱。據此大虛之候。血海尙有瘀血不盡。以致新血不得歸源。稍動。氣卽下如崩。蓋脾乃統血之經。虛則不能約束。且面浮食少。脾虛劇矣。急宜溫補。勢或可爲。人參、白朮各二錢。薑炭、粉草各五分。茯苓六分。香附八分。丹參炒過一錢。水煎服。四帖而瀉止。再以人參、白朮各二錢。茯苓、丹參、黃耆、蒲黃各一錢。薑炭、澤蘭葉、粉草各五分。調理全愈。

張溪亭乃眷。喉中梗梗有肉如炙。嚮吞之不下。吐之不出。鼻塞頭暈。耳常啾啾不安。汗出如雨。心驚膽怯。不敢出門。稍見風。卽遍身疼。小腹時疼。小水淋漓而疼。脈兩寸皆短。兩關滑大。右關尤搏指。此梅核氣症也。以半夏四錢。厚朴一錢。紫蘇葉一錢五分。茯苓一錢三分。薑三片。水煎。食後服。每用此湯調理多効。

溪亭子室。姪已七月。夢見亡過祖母。揮拳背打一下。驚醒。卽覺胎動不安。血已下。大小便皆急。腰與小腹脹疼者五日。此亦事之奇也。迺予爲治。兩寸脈俱短弱。此上焦元氣大虛。當驟補之。人參、阿膠、黃耆、白朮各二錢。當歸、白芍、條芩、杜仲各一錢。砂仁、香附各五分。苧根、嫩皮三錢。葱白六錢。一劑而血止。兩劑諸症悉

除而神漸安。四帖後。減去苧根。葱白。調理旬日。足月而產一女。陳茂之勞倦之後。勉強色慾。精竭而血繼至。續感風寒。發熱頭痛。胸高飽悶。始從太陽而傳至少陽。胸脇痛而耳聾。嘔逆口苦咳嗽。六脈俱弦數。此少陽症也。以小柴胡湯。加枳殼。桔梗。竹茹。而嘔逆止熱退。因進粥。早復熱口渴。小水不利。大便一日夜六七次。所行皆清水。日晡熱甚。舌上黃胎。昏沉振顫。此食復之候。書云。渴而小便不利者。當先利其小便。以猪苓湯爲主。猪苓。澤瀉。各二錢。滑石三錢。赤茯苓一錢。柴胡八分。升麻。木通各五分。連進二帖。小便利而大便實。但熱不退。以六神通解散一帖。其夜熱仍不退。次早診之。左脈不弦數矣。兩寸脈虛。以故服藥無汗。口渴漱水而不欲嚥。咽熱。此邪傳陽明經。不急涼血。必作鼻衄。病勢至此。可謂極惡矣。投黃芩芍藥湯。合生脈散。以止嗽渴。用葛根湯以解飢熱。白芍藥三錢。葛根。升麻。黃芩各一錢。人參一錢五分。麥冬。滑石各三錢。甘草。五味子各五分。烏梅一枚。急煎二帖。飲之。日中大便下燥糞十數枚。始得微汗。就得睡矣。晚進粥一盃。夜臥向安。

陳五山胃脘疼。醫作勞倦治不効。又醫作寒氣治。而用剛燥。痛轉極。又醫以巴豆

丸下之。大瀉皆水。亦無積滯之物。痛雖稍減。然面有虛浮。胸痞足腫。又張醫以人參、白朮各二錢。大補脾胃。則痰嗽氣逆。上膈熱甚。喉嚨乾燥。右脇不能貼席。大便一日二三行。因向被巴豆丸瀉起。迨今七日。猶瀉不止。飲食大減。延予爲治。診兩寸濡弱。兩關滑。兩尺洪大。予曰。據症原起於鬱火。亂投湯劑。大推大扳。以致加重。若平平治之。自當尋愈。二陳湯加薑連、枳實、薑黃、桔梗、蘿蔔子、前胡。一帖而熱嗽除。右脇亦可貼席。再劑而飲食進。大便實。其晚又爲怒氣所加。痰嗽脇痛如舊。且多煩躁。改用橘紅、貝母、瓜蒌、茯苓、山梔子、前胡、青皮、甘草、桑白皮、蘿蔔子。水煎飲之而平。

吳小峰年五十未有子。素有酒積作疼。晌午卽瀉。所下多稠粘之物。腹痛之疾。年已久矣。治當清潔中焦。分濕熱兼養脾法。用白滑石三兩、粉草、肉果各五錢、白芍藥酒炒一兩五錢、木香三錢、紅麴四錢、神麴糊爲丸。每早晚白湯送下二錢。服未竟而疾除。始舉一子。

沈大參玉陽老先生。中焦有食積痰飲而作痞滯。以故大便秘而不了。間或作脹。予脈之。兩寸短弱。關滑。兩尺沉滑有力。予曰。脾胃經有濕痰。蘊而爲熱。但清其

中宮使清陽升。濁陰降。而氣血自旺。此不補之補也。以二陳湯加枳實、酒連、酒芩、滑石、薑黃、木香、乾葛、山查兩劑而愈。

王敬泉頭暈且痛。起則倒仆。胸膈脹悶。如繩束縛。嘔吐而食飲皆不得入。六脈俱瀼。此痰飲挾木火之勢而作暈也。先以濟生竹茹湯而吐不止。且煩躁發飽發熱。再與蘆根湯。連進二碗。氣飽稍定。再以吳茱萸一兩爲末。以鷄子清調塗兩足心。引火下行。外用二陳湯加薑汁炒黃芩、黃連、旋覆花、枇杷葉、丁香、白豆仁、檳榔、柴胡。水煎服之。服後熱退。大便亦行。頭暈嘔吐皆止。惟胃脘有一塊作痛。仍與前藥兩劑。而塊亦消。

張二官發熱頭痛口渴。大便秘結三日未行。脈洪大。此陽明少陽二經之症。用大柴胡湯行三五次。所下者皆黑糞。夜出臭汗。次日清爽。惟額上仍熱。用白虎湯加葛根、天花粉。因食粥太早。復發熱。咳嗽口渴殊甚。且惡心。用小柴胡加枳實、山梔子、麥芽。次日渴不可當。改以白虎湯加麥門冬、天花粉。外與辰砂益元散。以井水調下五錢。熱始退。渴始定。不虞夜睡失蓋。復受寒邪。天明又大發熱。不知人事。急用小柴胡湯加升麻、葛根、前胡、薄荷進之。而汗出熱退。神思大瘳。四

肢皆冷。語言懶倦。且咳嗽。以生脈散加石斛、百合、大棗、白芍藥。服後咳嗽尋止。精神日加。飲食進。而向安矣。

大司馬潘印川第三令子室。尚書蔣公孫女也。年二十五。體素弱。語言端謹。因難產傷力。繼以生女。拂意後。又女死。悲戒。卽時暈厥。醒而神思昧昧。手足痠癢。目作上視。予更後始至。因痠癢不能診脈。細詢之。自女落地。惡露絕無。比有女醫在旁。乃昔所親信者。時與人參大嚼。及獨參湯并粥亂進。參與粥皆壅塞。高上下下。以故神昏痠癢不已也。予教以手於喉中探而吐之。喜其隨手吐出痰飲。粥藥盈盆。痠癢方定。乃與川芎、山查、澤蘭葉、陳皮、半夏、茯苓、香附進之。稍得睡。予亦出中堂就寢。不虞女醫又私與補藥二帖。子丑時。陡然狂亂如降神之狀。口中亂語云。我是觀音大士降壇。所言皆儒雅官話。問答如流。聲甚壯厲。殊無產後不足之態。生平不諳漢聲。至是出語如生成者。人皆異之。目爲神附。禳禱百般。予獨諍之。語諸左右曰。此惡露不盡。乃蓄血如見鬼之症。非真有神佛相附也。徐以正言叱之。卽緘默。繼以清魂散。加滑石、童便與之。至天明。小水乃行。狂亂皆定。迨予出房少頃。詎知女醫意欲要功。又不知與何藥服之。少刻。狂亂

如前。再與川芎一錢五分。當歸四錢。澤蘭葉、益母草各一錢。臨服加童便。連飲二帖不效。予逆思之。胸中必有餘痰。正滯。前劑中無佐使之品。故藥力不行也。卽用前劑。大如山查與之。惡露稍行。神思卽靜。嗣後稍睡少時。手足微動。或自以手掌其面。或自以手搥其胸。昏亂不息。診其脈近虛。早間面紅而光。申酉時面色白。此血行火退。故脈虛而當補矣。與人參、川芎、澤蘭葉各一錢。當歸、山查各二錢。茯苓、陳皮各八分。捲荷葉一片。煎熟。調琥珀末于五分。服下半時許。暖氣二聲。予喜曰。此清陽升而濁陰降矣。自茲安靜。夜中惡露微行。大便亦利。乃索粥飲。問其昨日漢聲何來。答曰。不知也。諸君始信蓄血如見鬼之言爲不誣。昔秦越人有言曰。病有六不治。信巫不信醫。一不治也。古稱用藥如用兵。以郭子儀之英明。而以魚朝恩監之便不成功。予固非郭令公之儔。彼女醫之誤。則又有過於魚朝恩矣。噫。寧不慎哉。

孝廉臧茗泉老先生脈左弦數。右寸弱。關大重則滑。右尺微。原以瘧後。復傷飲食。大便瀉而變痢。一日夜雖只五六行。皆積滯無盡。腹疼後重難安。午未後發熱。至天明始退。此夏傷於暑而秋爲瘧痢也。其熱乃瘧之餘邪。當先解散。然後以

補劑投之。則大便自愈矣。與神授香連丸一服。服訖。腹中腸鳴。須臾大便行。且較前更多。方有糞下。改以白芍藥四錢。澤瀉黃連各一錢。滑石二錢。粉草桂皮。木香各四分。山查七分。兩日後。乃與補中益氣湯。加木香黃連白芍藥。調理半月。潮熱大便皆愈。

包繼可先生令眷。孕三月而瘧疾發。先寒後熱。胸膈大脹疼。口渴。湯水入卽吐。譫語無汗。胎氣上衝而成子懸。脈皆弦大。以川芎柴胡黃芩知母甘草橘紅紫蘇枳殼砂仁水煎服之。吐止痛除。

一張氏婦。年纔二十一。其夫延予診之。左寸關短弱。尺滑。右寸亦滑。關濡弱。尺沉微。診畢。問予曰。脈何如。予曰。心神脾志皆大不足。肺經有痰。夫曰。不然。乃有身也。予曰。左寸短弱如此。安得有孕。夫曰。已七十日矣。予俛思久之。問渠曰。曾經孕育否。夫曰。已經二次。今乃三也。予問二產皆足月否。男耶女也。夫曰。實不敢諱。始產僅九箇月。手足面目完全。而水火不分。嚙肉一片。生下亦無啼聲。抱起已身冷矣。細檢之。乃知其無水火也。次亦九個月產下。又無啼聲。看時口中無舌。二胎之異。不知何故。聞先生能細心察人病。特祈審之。予方悟前二胎之不

完者。由心脾二經不足所致也。今左寸右關之脈可見矣。迺爲籌思一方。專以補心血爲主。令其多服。以百帖爲率。酸棗仁、遠志、茯神各一錢。白朮二錢。白芍藥、當歸、枸杞子各一錢五分。甘草五分。生地黃八分。艾絮二分。龍眼肉五枚。水煎服。足月而產一子。次年又有身。不以前事爲意。至九個月產下。形體俱具。外有脂膜一片。包其面耳目口鼻不見。但不能去此脂膜。產下卽歿。因思上年之子爲藥之力也。因予久不至。若其家以予方粘於壁間。一覺有身。卽照方服之。後生二子一女。里中以此方爲補天手云。

癸巳仲夏。吳比部鳳麓父母以次君絃臺先生。眼目紅痛。恐學道按臨。速於取效。乃聽眼科聲寒涼而治。兩越月無驗。又眼科視之曰。目疾不宜多用寒涼。恐冰其血。以人參五錢。枸杞子一兩。悉溫補之劑。凡用人參。枸杞子五六斤矣。目腫如桃。絕不能開。又專科語之曰。紅腫而痛。明是熱症。誤服溫補。反助其熱。寧不益腫。顧其勢。卽百寒涼。亦不易瘳。捷徑無如用下。此釜底抽薪法也。絃臺惟求速效。一聽下之。用大黃、芒硝、枳殼作大劑。下五六次。而飲食日減。惡心畏風。則不能出房門矣。又專門謂前劑欠當。大瀉之後。正合補也。又聽補之一補而目



腫如舊。又有眼師云。目疾熱症多。寒症少。只當滋補腎水。水升則火自降。火降而目疾斯愈矣。用是以滋陰降火之劑爲恃。纔數服。而精滑不禁。一夜夢遺一二次。神氣大脫。投補則目腫痛。用降則精元滑脫。屢試屢如是。諸醫無策。悉謝而退。乃修書命使自淮陰之海陽。懇祝令君介紹。徵予爲治。予始以遠爲懼。祝再四爲渠言。予亦素爲渠重。義不得以遠爲辭。乃介行李嚮往。至卽診之。左寸脈甚短。右寸大而無力。左關弦弱。右滑。兩尺亦滑。予見其坐在幔中。略不敢見。風問其日食幾何。答曰。三次計二碗許。葷腥絕不能用。予曰。夜臥安否。答曰。邇來甚苦於睡。纔合目卽夢。覺可畏。或被虎蛇交咬。或有鬼來勾攝。或落橋墜井。或與人爭鬥而負。猛然驚悟。冷汗淋淋。四肢癱軟。不能動憚。少頃乃定。今幸公不遠千里而臨。足徵素雅。予曰。足下始無大恙。只緣大推大扳。以致狼狽。若是彼專科者不足恃也。經謂五臟精華。皆上注於目。今專科局局然守其死法。安知五臟盈虛陰陽消長。隨時出入哉。以愚管見。但平平治之。易與耳。據足下之脈。心神脾志互相不足。肝膽之火鬱而不散。致生目痺。今爲補養心脾。壯其神志。則飲食日加。寢臥安穩。而精元有守。神水盈溢。何目痺之不愈哉。絃臺曰善。

惟先生命劑。乃以歸脾湯。減去黃耆。木香。加丹參而補心脾。以大安丸。專助脾胃而磨穀食。俾新痰不生。則氣血可繼。日而旺矣。後五日而飲食加。十日而夢覺少。尋能出戶。不畏風日。半月而肌肉生。目可觀奕。津津然而有萬全之兆。不虞專門張氏子復至。以白眼藥日頻點之。一日凡七八次。從此復不能開。驗肉風粟生滿。適予有南都之往。卒爲所誤。後幸有李少塘打去風粟。眼始能開。李雖手法精熟。然於軒岐闡奧。尙亦未窺籓籬。予後自南都至。見左目雖愈。右目終成內障。予故曰。彼專科者不足恃也。豈虛語哉。

丘太守鎮山翁令姪。淮陰人也。丁年患兩手筋攣。指掉不能屈伸。臂肉瘦削。體瘠面白。寢食大減。市中諸友調治無驗。乃任京口諸名家療之。半年肉更消。色更瘁。聞予在吳比部衙中。敦予爲治。診其脈六部俱弦。重按稍駛。診竟叩其受病之源。太守公曰。自上年冬底。偶發寒熱。筋骨疼痛。迨於仲春。寒熱雖退。而筋骨之疼不減。服藥無虛日。甚之日三四進。肉漸消去。指掉不隨。似有加於往昔。醫之來者。一曰風。二曰風。三四五六皆曰風。卽十數輩。又莫不皆曰風者。竭技盡方。卒無一應。奄奄床第。絕不知爲何病。予對公曰。此筋痿症也。乃少年不謹。慾

而受風濕。邪氣乘虛而入。醫者不察天時。不分六經。概而汗之。仲景治風濕之法。但使微汗津津。則風濕盡去。若汗大出。則風去而濕存。由是血氣俱虛。經云。陽氣者。精則養神。柔則養筋。虛則筋無所養。漸成痿弱。乃不足之疾。故陳無擇。朱丹溪。劉宗厚。皆謂諸痿切不可作風治。誤則成痼疾。公聞言愕然曰。服風藥幾二百劑矣。顧今已痼。奈之何。予對曰。令姪青年。猶可圖也。公曰。用何法。予曰。法當大補氣血。經云。氣主煦之。血主濡之。氣血旺。則筋柔而軟。由是乃可以束骨而利機關也。抑何掉之有哉。病者聞言大喜曰。聆先生詳病之源。治法之略。雖未服藥。已覺沉疴去體矣。即請劑。予以五加皮、薏苡仁、紅花、人參、鹿角膠、龜板、虎骨、當歸、丹參、地黃、骨碎補、蒼耳子之類。服兩月。肌肉漸生。飲食大進。兩手指掉亦平復。

一書辦年過五十。糟酒縱慾無憚。忽患下消之症。一日夜小便二十餘度。清白而長。味且甜。少頃凝結如脂色。有油光。治半年不驗。腰膝已下皆軟弱。載身不起。飲食減半。神色大瘁。脈之六部大而無力。書云。脈至而從。按之不鼓。諸陽皆然。法當溫補下焦。以熟地黃六兩爲君。鹿角霜、山茱萸各四錢。桑螵蛸、鹿角膠、人

參、白茯苓、枸杞子、遠志、兔絲子、懷山藥各三兩爲臣。益智仁一兩爲佐。大附子、桂心各七錢爲使。煉蜜爲丸。梧桐子大。每早晚淡鹽湯送下七八十九。不終劑而愈。或曰。凡云消者。皆熱症也。始公具方。人多議之。今果以溫補成功。此何故哉。予曰。病由下元不足。無氣升騰於上。故渴而多飲。以飲多小便亦多也。今大補下元。使陽氣充盛。熏蒸於上。口自不乾。譬之釜蓋。釜雖有水。若底下無火。則水氣不得上升。釜蓋乾而不潤。必釜底有火。則釜中水氣升騰。熏蒸於上。蓋纔濕潤不乾也。予已詳著醫旨緒餘中。茲不多贅。

僉憲韓約齋老先生令子室。每怒動則夜臥不安。如見鬼魅。小水淋瀝。今又大便秘結。腹中疼痛。腰跨脹墜如生產狀。坐臥不安。因痛而脈多不應。指此肝經鬱火所致。法當通利。以杏仁、桃仁各三錢。柏樹根皮、山梔仁、青皮各一錢。檳榔五分。枳殼八分。水煎服之。少頃大便通。痛脹隨減。

僉憲韓約齋老先生夫人。向來夜分臍腹疼極甚。必用炒鹽熨之。兩時久乃止。次日必頭痛。兩太陽如箍。遍身亦疼。此上盛下虛症也。先用柴胡、川芎、粉草、酒連、薄荷、天麻、橘紅、茯苓、半夏、蔓荊子。水煎服。數帖頭痛全止。惟咳嗽胸前略痛。兩

寸脈浮滑。兩尺弱。再用鹿角霜、鹿角膠、補骨脂、遠志、枸杞子、金鈴子、香附子、煉蜜爲丸。梧桐子大。每空心及下午食前。淡鹽湯送下。七十九而瘳。

孝廉丁震瀾。丈令郎。纔二歲。瘧母。上壅咳嗽。每午後發熱。至子丑時乃退。終日啼哭不止。鵝口白屑。神氣大弱。痘後遍身瘡疥未愈。多方治之不效。有灸之者。有刺之者。有以膏藥貼之者。種種施之。全然不應。予曰。乳下嬰孩。臟腑薄脆。不可亂攻亂補。參耆足以增其嗽。灸刺適以驚其神。安能取效。予教以白朮、鼈甲各一錢五分。青蒿、麥芽、陳皮各八分。烏梅一枚。貝母、知母各六分。甘草三分。入帖全愈。

武進令君孫康。字公子室。臧位。字丈女也。年十六。初產女艱苦二日。偶感風邪。繼食麵餅。時師不察。竟以參朮投之。卽大熱。譫語口渴。汗出如洗。氣喘洩瀉。瀉皆黃水無糞。一日夜不計遍數。小水短少。飲食不進。症甚危惡。時當六月初旬。女科見熱不除。乃投黃芩、芍藥、黃連、寒涼之劑。諸症更甚。又以參朮大劑。肉果、乾薑等止瀉。一日計用人參二兩四錢。瀉益頻。熱益劇。喘汗轉加。譫語不徹。口醫各縛。予辭謝曰。書云。汗出如油。喘而不休。死症也。又汗出而熱不退。瀉而熱不

止。且譫語神昏。產後而脈洪大。法皆犯逆。無生路矣。惟附子理中湯。庶徼倖於萬一。適予爲顧太守肖溪公延至。卽過爲一診。六脈亂而無緒。七八至。獨右關堅硬。躊躇久之。因思暑月汗出乃常事。但風邪麵食瘀血。皆未消溶。補劑太驟。書云。蓄血如見鬼。治當消瘀血。麵食。解其暑氣。猶可圖生。勿遽棄也。有臧玉宇者。位宇堂兄也。醫有雅致。深以予言爲然。而速予措劑。予曰。劑憑症發。難拘常套。不常之症。須用不常之藥。乃用益元散六錢。解暑氣清熱爲君。仲景云。渴而小便不利者。當先利其小便。況水瀉尤當用之爲君也。以糖毬子三錢爲臣。紅麴、澤蘭葉各一錢五分。消瘀血安魂爲佐。香附一錢五分爲裨佐。橘紅半、夏麴、茯苓乃統理脾氣爲使。京三稜五分。消前參朮。決其壅滯爲先鋒。水煎飲之。飲下卽稍睡。譫語竟止。連進二劑。其晚大便減半。次日仍用前劑飲之。其夜熱大減。大便只二次。有黃糞矣。惡露略行。黑血數枚。又次日診之。脈始有緒。神亦收斂。進粥一盞。大有生意。前方減去京三稜、紅麴。加白扁豆。其夜大便一次。所下皆黑糞。從此熱盡退。大便亦實。改用四君子湯。加益元散、青蒿、香附、白扁豆、酒炒白芍藥、炮薑。調理而安。

吳東星上舍。辰州太守公長君也。冒暑赴南都試。落第歸而怏怏。因成瘧。自八月中旬。延至十月。瘧雖止。而腰痛白濁。日夜咳嗽。肌肉大消。藥劑亂投。認爲風者。以羌活防風續斷等發散。認爲虛者。以六味地黃丸爲補。認爲火者。以芩連梔子黃柏知母天花粉生地黃瀉其火。認爲半虛半實者。投以獨活寄生湯。認爲寒者。以大附子肉桂鹿角膠參朮溫補之。痛劇欲死。叫撼四鄰。予脈之。左弦細。右滑大。俱六至。口渴赤。予知其昔患楊梅瘡。餘毒尙伏經絡。適因瘧後氣血不足。舊毒感動。故痛而暴也。以當歸芍藥甘草牛膝鈎藤苡仁木通白蘚皮。用土茯苓四兩煎湯代水煎前藥。服下而痛止。咳嗽亦除。脈緩其半。連服數劑。大效。精神漸復。乃起而督工視事。冬至日爲酒興鼓舞。縱慾無忌。次日腰如束縛。足面亦疼。左眼赤。小水短。足底有火從兩胯直衝其上。痛不可言。予以當歸鈎藤甘草白芍藥牛膝苡仁石斛紅花生地黃柏調理三日。症已守定。略無進退。適大雪寒凍殊甚。有女醫爲渠宅所親信者。因其大便燥結。一日夜服玄明粉一兩五錢。大便且不行。而腰痛愈猛。兩足攣縮。氣息奄奄。一語而三換氣。面青慘。渠自覺危急。迺喚內人及弟叔囑其後事。天明予至診之。六脈俱伏。痛使然也。

扣其由。乃知服玄明粉所致。予曰。症雖熱。便雖燥。但公病不在腸胃而在經絡。筋骨間。徒瀉腸胃無益也。且冬月陽氣閉藏。藏瀉則陽氣虧乏。來春無發生根本矣。今四肢拘縮。腰胯痛劇者。由日來天令寒極。經絡凝澁也。寒主收斂。法當溫散寒邪之標。使痛定。然後復治其本。庶可保全。乃用桂心、杜仲、炙甘草、蒼朮、破故紙、五加皮、連與二劑。痛定而四肢柔和。飲食始定。予知渠宅素喜速效。予適有荆溪之往。迺宣言曰。足下之疾在經絡。顧今天令嚴寒。幸寧耐。以俟春和。爲足下拔去病根。渠宅不以予言爲然。迺用張雲溪調理。予亦讚張之可守。蓋張氏藥用養血清熱。雖不去病。亦不害事。迨二月太守公歸。迺改用沈春宇。沈揣渠必以酒色而致陰虛。迺純用滋陰降火之劑。以爲旬日可奏功也。及調治月餘。略無影響。予從荆溪歸而謁渠。爲三月初旬也。渠聞予至。卽以沈藥呈予。且語予。公許春和拔除病根。此其時也。予知太守公方篤信沈。隨以溫語慰渠曰。沈公名士也。可使彼展盡底蘊。沈又調理半月。以無功而行。沈去。予再以煨腎散進。大瀉五六度。四肢冰冷。舉家大恐。以予瀉之爲非也。予曰。病從此日減矣。夫奚憂。後進理脾藥。服數帖。神氣始轉。腰胯柔和。可下床舉數步矣。方始信。



而問予曰。人皆以補爲治。公何得病源之真。於三月之前。先已預定。節節如公語也。予曰。此楊梅瘡餘毒。伏於經絡。豈補劑所能去哉。予故先爲疎通濕熱。然後以補劑收功。則無反覆之患。後仍以葳靈仙末子二錢。入猪腰子內煨熟食之。又瀉一二度。病根盡拔。改用苡仁。當歸。生熟地黃。白芍藥。牛膝。黃柏。丹參。龜板。調理全安。

潘見所老先生有一小盛價。年可十六七。發熱於午後。城中周友以爲陰虛。而爲滋陰降火。服三十餘劑。熱益加。且腹中漸脹。面色清白。仍以六味地黃丸。加黃柏。知母。麥冬。五味子之類。又三十劑。而腹大如斗。堅如石。飲食大減。髮黃成穗。額顛光亮。口渴不可言。兩腿大肉消盡。眼大。面肉皆消。肌膚枯燥如松樹皮。奄奄一骷髏耳。予觀其目之神。尚五分存。欲爲治劑。潘公門下諸人語予曰。形症如是。死在目下。尙可服藥乎。予曰。症非死候。爲用藥者誤耳。譬之樹木。若根本壞而枝葉枯焦。非力可生。今焦枯乃斧斤傷其枝葉。而根本仍在也。設灌漑有方。猶可冀生。安可遽棄。予以神授丹。日用一丸。煮猪肉四兩飼之。十日。腹軟其半。熱亦消其半。神色漸好。潘見老詰余曰。此何症。公能肉枯骨如此之神。予曰。

此疝積症也。彼誤認爲腎虛。而用補陰之藥。是以滯益滯。腹焉得不大不堅。公曰。彼純用寒而熱愈熾。君用非寒而熱反退。此何說焉。予曰。此熱迴濕熱由脾虛所致。補陰之劑皆濕類。蓋脾屬土。惡濕喜燥。今以大蘆會丸肥兒丸。調理一月。可全瘳矣。公曰善。無先生。此僕已爲泉下物矣。

少司空凌繹泉翁年已古稀。原有痰火之疾。因正月上旬。爲令孫大婚過勞。偶占風寒。內熱咳嗽。痰中有血。血多而痰少。痰堅不易出。鼻流清水。舌生芒刺。色焦黃。語言強硬不清。大小便不利。喘急不能睡。亦不能抑。惟坐高椅。椅前安桌。桌上安枕。日惟額伏枕上而已。市醫環治半月不瘳。敦予診之。兩手脈浮而洪。兩關滑大有力。知其內有積熱痰火。爲風邪所闕。且爲怒氣所加。故血上逆。議者以高年見紅。脈大發熱爲懼。予曰。此有餘症。諸公認爲陰虛。而爲滋陰降火。故不瘳。法當先驅中焦痰火積熱。然後以地黃補血等劑收功。斯不失先後着也。翁以予言爲然。用瓜蒌、石膏各三錢。橘紅、半夏、麩、桑白皮、前胡、杏仁、酒芩、紫蘇子、水煎。臨服加入蘿蔔汁一小酒盞。一劑而血止。次日診之。脈仍浮而洪大。尙惡寒。予曰。古云。傷風必惡風。傷寒必惡寒。此其常也。只因先時失於清散。表中

之熱未徹。竟用滋陰之劑。又加童便收斂。降下太速。以致風寒鬱而不散。故熱愈甚也。改以定喘湯一劑。而喘急減半。再劑熱退而不惡寒。復爲診之。兩手浮體已無。惟兩關之脈甚鼓指。此中焦痰積膠固已久。不可不因其時而疎導之。以清中丸。同當歸龍會丸。共二錢進之。其夜大便所下稠粘穢積甚多。予憶朱丹溪有云。凡哮喘火盛者。以白虎湯加黃連枳實有功。此法正繹翁對腔劑也。與十劑。外以清中丸。同雙玉丸。夜服調理而安。

周鳳亭公。年五十有八。正月腸風下血。又飲食過傷。大吐。而朱友以枸杞地黃膏一斤進之。不知此公肝氣素盛。中焦原有痰積。且多思傷脾。又值卯木正旺之月。投以地黃枸杞。適以滋其濕而益滯其痰耳。由是飲食減少。肌肉日消。腹中痞滯。又吳友以歸脾湯進之。詎知濕寒未除。先用溫補。是以油撲火。勢成燎原。以致大便燥結。口乾舌燥。據已午未三時。中焦蒸蒸發熱。煩悶。酉時而退。此皆濕熱壅滯於脾無疑矣。且面色黃中帶黑。下午足面有浮氣。皆是濕熱傷脾之徵。法宜清肅中焦。徹去濕熱。則飲食自加。而新痰不生。宿痰磨去。庶五穀精華不生痰而生血矣。血充則精神長而肌肉可復。且秋來無瘧痢之患。公曰。清肅

中焦當用何劑。予曰。二陳湯。加薏苡仁。酒炒白芍藥。麥芽以養脾而消痰。以枳實。黃連。洩痞而去熱。以青蒿。分利陰陽而消其黃。葛根。升引清陽之氣。使肌熱清。而口渴可止矣。當服十劑。公曰。先生之方善。但枳實。黃連。恐體虛者。不足以當之。予曰。惟此二味。適可以去公之病根。舍是則不效。緣中焦有餘之疾。非此不能去。亦非他藥所能代。公半信半疑。服四劑。而諸疾皆愈。公遽中止。不復服。完。至七月盡。果發痢疾。而以木香。檳榔丸。下去稠積甚多。迺追悔予言而延之診。予教以前方。仍服十劑。夜以丹溪保和丸調理。則永無瘧痢之患矣。

令郎采石先生。中焦濕熱。生痰。否悶。五更倒飽。且下午兩股。或膝下筋脈。抽掣疼痛。時常暖氣。面色帶黃。間常夢遺。予以清氣大安化痰丸。及猪肚丸。二方調治。而安。猪肚丸。用白朮五兩。苦參酒炒二兩。牡蠣煨過三兩。爲末。將雄猪肚子一具。搗去油。甘草湯洗過。將藥裝入肚中。縫其口。飯中熬極爛。爲度。搗極勻。爲丸。此方極健脾。去濕熱。回精丸也。清氣大安化痰丸。用白朮四兩。橘紅。半夏。山查。各三兩。黃芩。黃連。俱生薑汁炒。各一兩五錢。枳實。瓜蒌仁。各二兩。白芥子。蘿蔔子。各炒一兩。薑黃。鹹水煑乾。一兩。青黛五錢。麥芽取麩。打糊爲丸。萊菔大。每食。

後及。夜茶送下二錢。

令孫女纔六歲。忽發寒熱。一日過後。腰脊中命門穴間骨節腫一塊。如大饅頭之狀。高三四寸。自此不能平身而立。絕不能下地走動。如此者半年。人皆以爲龜背痼疾。莫能措一法。卽如幼科治龜背古方治之。亦不效。予曰。此非龜背。蓋龜背在上。今在下部。必初年乳母放在地上坐早之過。比時筋骨未堅。坐久而背曲。因受風邪。初不覺其漸入骨節間而生痰涎。致令骨節脹滿而大。不急治之。必成痼疾。今起未久。可用萬靈黑虎比天膏貼之。外再以晚蠶沙醋洗炒熱。絹片包定。於膏上帶熨熱之。一夜熨一次。再以歲靈仙爲君。五加皮、烏藥、紅花、防風、獨活。水煎服之。一月而消其半。骨節柔軟。不復腫硬。便能下地行走如初矣。人皆以爲神奇。此後三個月。驀不能行。問之。足膝痠軟。載身不起。故不能行。余知其病去而下元虛也。用杜仲、晚蠶沙、五加皮、薏苡仁、當歸、人參、牛膝、獨活、蒼耳子、仙茅。水煎服二十劑。行動如故。

閔文學。蠶樓。患虛損咳嗽。晝輕夜重。乃政丁氏。長興富翁女也。軀甚肥。性甚躁。患痛風。手不能沐櫛。足不能履地。凡痛處略腫。呻吟喊叫。比有朱遠齋氏。爲時推

重。夫婦倚朱治者七越月。纖毫不減。吳九宜翁。迺舉予治。至其家。蚤樓大兄岳樓。旦暮與偕。診畢。語岳樓曰。令弟之症。雖易見功。然非百日不能斷根。丁氏症。十日便可刈其根。但恐不能盡吾劑。奈何。岳樓曰。何謂也。予曰。令弟咳嗽。由肺火未清。誤服參朮太過。而然。但爲清肺利肺。咳可立止。止後。以補心安神之劑。養之。則萬全矣。藥用麥門冬、桑白皮、白藥子、貝母、桔梗、甘草、黃芩、枳殼。十帖。咳嗽全止。惟心血不足。神不固精。以酸棗仁、遠志、麥冬、蓮花心、丹參、調養百日。果能出戶肄業。丁症。迺濕痰凝滯。經絡作痛。朱公作血虛。而投以地黃芍藥。當歸、人參、牛膝之類。宜其痛愈加。而病愈久也。今必須燥濕流動之劑。疎決一番。庶經絡通暢。雖不服補劑。而五穀精華。足以自充。但疎決之劑。不能止痛。恐其不。余信而中止也。岳樓曰。先生旣已言明。惟命是聽。用二陳湯。加烏藥、葉、蒼朮、僵蠶、海桐皮、南星。服至五帖。果不懼。而欲止藥。岳樓白。孫君已先言十帖見功。今過半。何不勉強。而使功虧一簣哉。又服一帖而止。百般強之不從。迺揚言曰。請醫療。痛而反加痛。吾何藥爲。後四劑。斷斷乎不敢奉命矣。時已申刻。予知其富家。矯態。亦不強服。隨以芫花醋炒過三分。海金沙一分爲末。白湯調下。至晚瀉。

一次。下稠痰半盆。足痛減大半。稍能動止。初更後。吾輩酒猶未散。忽報云。腹中大痛。促予進看。行至後堂。內中人出而止曰。病者卒矣。不勞進看。乃曰。此必痛厥。非長逝也。烏可不進一看。至卽冷汗淋漓。兀坐溺器。面青息斷。執而診之。手冷如冰。但六脈俱在。惟沉伏耳。知其爲痛極使然。用生薑湯灌之而甦。徐語近侍女使曰。適來腹中痛甚耳。後火光灑出。肛門如焚。大響一聲。不知瀉下何物。衆看之。迺血鰓一條。長六寸。闊半寸餘。鱗目俱在。盆中尙能遊動。衆皆悚駭。岳樓問曰。此鰓下可好否。予應之曰。此尤物也。得下豈不好。但下症實由痰作。予特爲行痰。初不知其有蟲如是。第藥中有芫花。迺殺蟲之物。故偶中。亦令弟之福也。次日手足皆能動。仍以二陳湯加苡仁、紅花、五加皮、四帖。脫然如故。閔宅以予不矜功而益重予。

金哥閒令堂。暑月患痢。小腹窘迫。胸膈膨脹。口舌焦渴。右寸關脈洪滑。左脈弦。迺氣鬱食積痢也。先與木香檳榔丸。開而下之。微利一二度。因口渴食西瓜一片。卽惡心而吐。昨大便秘後。胸膈寬快。就進飯一碗。致腹飽悶。兀兀欲吐。所吐皆痰涎。乃以溫膽湯加減治之。半夏四錢。枳實一錢五分。竹茹二錢。橘紅、茯苓

各一錢。甘草五分。薑連八分。生薑五片。水煎服之。一飲而胸膈舒暢。便能就枕而睡。惡心頓無。痢亦尋止。

徐中宇之婦。汗出如雨。昏昏憤憤。兩手無所着落。胸要人足踹之。不少放。少放卽昏憤益甚。氣促不能以息。稍近風則嘔惡暈厥。與九龍鎮心丹一丸服下。卽稍定。少間則又發。始知胸喉中有物作梗而痛。湯水難入。卽藥僅能吞一口。多則弗能嚥下。乃以蘇合香丸與之。暈厥尋止。心痛始萌。昨日六脈俱伏。今早六部俱見。惟左寸短濇。知其痛爲瘀血也。用玄胡索、桃仁、丹皮、丹參、青皮、當歸、香附。其夜仍暈厥一次。由其痛極而然。再與玄胡、丹皮、桃仁、丹參、香附、青皮、烏梅、人參、貝母、桂枝、赤芍藥。服此痛減大半。乃自云。心虛有熱。頭眩。加山梔仁。居常多夢交之症。近更甚。以其心虛故也。人參、石斛、丹參、貝母、當歸、白芍藥、酸棗仁、酒連、香附。調理全安。

金文學達泉先生令政。暑月患痢赤白。一日夜三十餘度。後重腿急口渴。小腹痛。孕已二月。幸而腰不痛。右手脈弦。左脈滑。與白芍藥三錢。黃連、黃芩、當歸、陳皮、香附各一錢。桂皮、木香各五分。水煎服。外與香連丸。服下後重稍輕。因進飯太



早。其夜仍十數度。次早診之。右絃減半。前藥煎成。吞女金丹一帖。痢減大半。六脈已和。但軟弱。此氣血不足。宜從補養。用八珍湯。加陳皮、香附、阿膠、條芩。一帖全安。凡孕婦痢疾。後重稍輕。腹痛稍減。獨痢不止。必須補養血氣爲主。加調氣之劑爲佐。庶可保胎。斯亦丹溪虛固而痢自止之意也。

金元岩文學。下午發熱。痢下紅多白少。一日夜七十餘度。後重下墜。飲食不思。左脈細數。右脈滑。此陰虛之候。詢知二日前曾夢遺。續得痢疾。陰虛明矣。但滑脈主食積。法當先補後攻。乃與小建中湯一帖。白芍藥三錢。桂枝七分。粉草、酒連、酒芩各八分。當歸一錢。檳榔五分。水煎飲之。夜半復診。脈稍充指。改與枳殼三錢。桃仁一錢。當歸四錢。煎熟。吞木香檳榔丸一錢五分。至天明。大便瀉三次。則見糞矣。次日午進飯。又食火肉。隨即大便頻併。後重如前。與山查枳朮丸一服。不效。再爲診之。六部皆虛軟無力。獨右關滑。此進肉飯太早。脾弱不能消磨。宜健脾氣。兼爲升舉。人參、黃耆各二錢。白朮一錢。升麻三錢。防風、藿香、炮薑、粉草各五分。白芍藥一錢半。茯苓八分。連進二帖。痢減而後重寬。因食狗肉過多。復傷脾氣。前方加砂仁、山查。調理全愈。

金文學達泉先生。因食肝白腸內傷。續又冒風。就成瘧痢。日夜四十餘度。小腹痛甚。每登廁。汗出如雨。下迫後重。小水澀痛。頭疼口渴。下午發熱。天明始退。左脈浮弦而數。右軟弱。中部稍滑。此內傷飲食。外感風邪。瘧痢併作。法當速治。否則深秋陽氣潛藏。邪因陷下。未易瘳也。乃先與柴苓湯一劑。小便即清。不痛。瘧發時寒多熱少。晚與人參敗毒散加減。人參、乾葛、防風、桂枝、粉草、茯苓、枳殼各五分。柴胡、白芍藥各一錢。水煎飲之。次日頭痛痢疾俱減。夜纔起三次。改與補中益氣湯。加酒苓、桂枝、白芍藥。其夜瘧止。但微熱。再改胃風湯。人參、白朮、桂皮各二錢。白芍藥四錢。當歸一錢五分。茯苓、川芎各八分。酒苓、酒連各一錢。炮薑二分。地榆五分。服後寒熱殄迹。夜起一次。已是真糞。前方減去桂枝。再三劑。而巾櫛出戶矣。

金寄閒先生。七月既望。患頭痛口渴。汗大洩。不斂。嘔惡發寒熱。間日一發。而發於陽日。迺爲診之。兩寸洪大有力。左浮弦而數。右脈稍軟亦絃長。此少陽與陽明合併爲瘧。以柴葛解肌湯主之。柴胡、葛根各二錢。白芍藥、石膏各二錢。粉草、桂枝各五分。知母一錢。薑三片。水煎飲之。次早左脈稍退。迺與補陰鱉血何首烏

丸截之。又與黃耆芍藥湯一帖。以防作痢。白芍藥、石膏、黃耆各三錢。桂枝五分。知母、粉草各一錢。柴胡七分。薑三片。煎服後。加人參七分。瘧竟全止而向安矣。淮陰胡少泉翁。麗水縣三尹也。令郎年弱冠。患夢遺。百治不應。體倦而氣弱。食少而汗多。四肢痿軟。頭眩肌熱。將成瘵疾。知余在理。刑吳比部衙中。敦余爲治。其脈兩寸短。左寸尤甚。餘部滑數。余曰。郎君之脈。心氣大弱。蓋心者神之舍。神者精之主。神旺始能固精。今遺不禁。由神弱不能固攝其精。致多妄洩。時近端陽。諸症叢集。迺兼注夏病也。法當養心安神。庶不成瘵。翁曰。然前此諸公。每爲滋陰降火。多不見功。徒見損脾減食。今先生主以養神。願以先生是聽。迺與人參、黃耆、石蓮子、酸棗仁、蓮花心、石菖蒲、遠志、當歸、補心安神爲君。俾精固汗斂。經曰。汗者心之液。汗多則心血愈虛。故佐以甘草、白朮、黃精、麥門冬、五味子。兼治注夏。使飲食加而四肢壯。緩而圖之。可萬全矣。藥進甚妥。竟以此方調理。果精固神全。肌熱盡退。又令愛及筭。頭痛微熱。經水愆期。日多咳嗽。食漸減。肌漸消。口渴。睡臥不寧。喉中血腥。四肢不寧而疲。體不動而汗。六脈弦而且數。左關長出寸口。余以逍遙散。加石斛、丹參、牡丹皮、酸棗仁、山梔子、麥門冬調理而瘳。又

一文學貧士也。忘其姓氏。與胡少泉翁爲碩交。有奇疾。兩足不瘦不痛。每行動。絕不聽其所用。或扭於左而又墜於右。或扭於右而又墜於左。之玄而行。不能一步步正走。此亦目之稀覯。竟不識爲何疾。書無所考。予臆度之。由筋軟不能束骨所致。故行動則偏斜扭墜也。夫筋者肝之所主。肝屬木。木縱不收。宜益金以制之。用人參、黃耆、白芍藥以補肺金。薏苡仁、虎骨、龜板、杜仲以壯筋骨。以鐵華粉專制肝木。煉蜜爲丸。早晚服之。別後三載。族姪理問公敬亭南還。道出淮陰。胡少泉寄語云。向者鐵粉所愈之疾。淮人極以爲奇。遠邇敦錄其方。布傳以頌。自恨貧儒。弗能致一芹爲謝。旦暮額手南斗。以識不忘云。

一吳氏婦有隱疾。其夫訪於予。三造門而三不言。忸怩而去。後又至。未言而面先赧。予因詰之曰。諸來詣予者。皆謂余能爲人決疑療患也。今子來者四。必有疑於中。疑而不露一語。雖百來而疑終不可決。疾終不可去矣。且盈天地間。怪事甚多。非聖智所能盡識。然亦非聖智不能通療也。彼折肱錄、醫鑑、醫說等集。怪症蝟毛。假非明哲決而治之。何以擴後人之聞見也。其夫乃俛首徐應曰。言之無任主臣。先生長者。卽言之。諒無哂。山婦子戶中突生一物。初長可三寸。今則

五寸許矣。狀如堅筋。色赤。大可拱把。脹而且痛。不便起止。憎寒壯熱。寢食俱減。羞澁于言。每求自盡。聞先生能爲人決疑療怪。不啻扁華。特相訪而祈一決。予曰。疾成幾年。對曰。將百日。予曰。蓋凡所謂怪者。耳目無所聞覩。書籒無所註載。今所言者。迺陰挺症也。書有所徵。奚足言怪。夫曰陰挺。何自而生。何法而治。幾何月日。而可愈也。可無妨于生育否。予曰。子戶屬厥陰。肝經。肝屬木。肝有溼熱。故生陰挺。猶木有溼熱而生蕈。然法當以龍膽瀉肝湯。及蝟皮散。當歸黃芩牡蠣蝟皮赤芍藥爲末。每用二錢。空心米飲調下。卽而治之。大計月餘。可消釋也。奚生育之有妨哉。其夫合手頂禮於地曰。願如藥王言。敢徼一料。隨按法措劑。畀之而去。甫三月。來報云。前疾果如所言。消釋無痕。茲爲汛期。一月不至。敢問予曰。此有身也。夫曰。疾纔愈。未必卽能受身。恐防他疾。予曰。前恙匪肝經有餘之疾。肝爲血海。書云。女人血盛則懷胎。據血盛行當先期。今汛踰期。實孕耳。匪病也。後果足月而產一子。

前坵一染匠之婦。腹痛兩月矣。或以爲寒。爲熱。爲氣。爲虛。爲食積。爲蟲。遞嘗試之。轉加。一醫與膏藥如斗大者一個。滿腹貼之。痛益劇。迺揭去。膏藥卽粘牢不可

起。火熨油調。百計不能脫分寸。如生在肉上相類。無可奈何。知予在吳鄉官宅中。迺買舟就予診。及抵吳門。轎口匠乃偕迺母迺姑。四人盡力扶挽。絕不能動。移一步。岸上環視如堵。莫不語。匠曰。病勢若此。時刻難抵。固迺強其起而欲污吾轎口耶。匠迺止。婦舟中起而懇予爲治。至舟中。見其面色蒼黑。及伸手求診。皮膚燥若老松樹皮之狀。六脈皆洪數。問其腹中之痛何在。匠卽爲解衣露腹。指其痛所。始知膏藥粘牢之故。此甚希觀。叩其不能舉步之由。婦曰。非力弱不能行。迺左脚不可動。動卽痛。應於心。是以一步不能舉也。予俛思。若色若脈。皆非死候。胡治而益劇也。此必腸癰。左脚莫能舉。是其徵也。與營衛返神湯。加金銀花爲君。與四帖酒水各一碗。煎服一帖。痛稍減。二帖下臭膿半桶。痛全減。腹上膏藥不須手揭。自脫而下。由熱去而膏脫也。四帖完。其婦同匠詣吳宅拜謝。予并求善後之方。吳宅見之一族皆驚。

王祖泉大便裏急後重。腹痛。日夜下紫黑稠粘。三四十度。市中凡有名者。雷同痢治。自秋歷冬。三越月不瘳。形色瘦瘁。匙筋厭舉。卽勉強僅一盞而止。眼闔懶開。悉以爲不治。棄去。訪予脈之。六部濡弱。觀其所下之色甚晦。如芋苗汁之狀。予

曰。觀此色非痢。迺臟毒下血症。醫說中人參樗皮散。正此對腔劑也。卽製與之。其夜果減半。終劑全愈。方以人參、樗根、白皮各二兩爲末。每空心米飲調服二錢。忌肉、汁、生菜、魚、腥。

癸巳秋仲。南都大司馬裏洪溪老先生。以兼署工部都察院。操江印。日衝暑往來各衙門。而經略其政事。致發熱燥渴。因解燥渴。而過食水浸瓜梨新藕。遂成洩瀉。小水短少。醫以胃苓湯加滑石、木通、車前子。利之而瀉止。大便又因之結燥。艱澁不堪。迺用潤腸丸。復瀉不止。又進以前通利之劑。瀉雖止而小水竟不得流通。直達臍下。脹急。立起解之。則點滴不出。臥則流之不竭。以頻取夜壺。致通宵不得寐也。治半月餘。而精神削。寢食廢。聞予寓崔勳部衙。而徵予治。初見卽告以受病之源。又謂都城諸醫。俱不識爲何症。將認爲癰。則立解時。點滴不出。認爲秘。臥則涓涓而流。謂爲脾約。大便又不結燥。謂氣虛下陷。心血不足。而補中益氣湯。與安神丸。服過十晝夜無益。雅聞先生高手。願一診以決之。探其脈。兩寸短弱。關緩大。兩尺洪大。語之曰。此餘暑未解。而司馬素善飲。溼熱流於下部也。今已下午。恐診之未準。俟明早細察而再定方。公曰。延頸吾子久矣。適所

言近似。願亟求一劑飲之。徹夜間一睡。余不得已。以益元散三錢。煎香薷湯之。略無進退。次早復診。六脈如昨。予思之而恍然悟。又語之曰。此症尿竅不對也。司馬曰。名出何書。予曰。內經云。膀胱者。脬之室也。脬中溼熱下墜。故立解而竅不對。小水因不得出。臥則脬不下墜。而尿滲出膀胱。亦以竅不對。小水雖涓涓而流。亦不能通達直遂。故了而不了也。治惟提補上中二焦元氣。兼清下焦溼熱。斯得矣。又有一法。今氣虛下陷已久。一兩劑未能取效。安得伏枕而睡。且此不寐。非心血不足之故。因着心防閑小便之了而不了。而不敢寐也。暫將舊衣或布襯於席上。不必防而任其流出。又免取夜器而勞動其神。自然熟睡矣。以補中益氣湯提補上中二焦之元氣。加黃柏。知母。祛下焦之溼熱。夫清陽升則濁陰自降。脬無溼熱。則不下墜。竅可對而病可瘳矣。司馬忻然。請藥。夜如法觀之。果嗒然一睡。相忘其尿之出不出也。次早視襯布雖溼而不甚。以久不闔目。得此一睡。神氣頓回。胸臆爽快如未病者。調理四日而病全安。司馬大喜而欲留久住。緣漕運李公相延之亟。弗克也。差大馬舡鼓吹送予阡關而還。

崔百原公者。河南人也。年餘四十矣。而爲南勳部郎。患右脇痛。右手足筋骨俱痛。



艱於舉動者三月。請醫作偏風治之。不效。馳書邑大夫祝公。徵予治。予至。視其色蒼。其神固。性多躁急。診其脈左弦數。右滑數。時當仲秋。予曰。此溼痰風熱爲痺也。脈之滑爲痰。弦爲風。數爲熱。蓋溼生痰。痰生熱。熱壅經絡。傷其營衛。變爲風也。公曰。君何以治。予曰。痰在經絡。雖不害事。然非假歲月不能愈也。隨與二陳湯。加鈞藤、蒼耳子、薏苡仁、紅花、五加皮、秦艽、葳靈仙、黃芩、竹瀝。薑汁飲之。數日。手足之痛稍減。而脇痛如舊。再加鬱金、川芎、白芥子。痛俱稍安。予以赴漕。運李公召而行。速勸公請假。緩治。因囑其慎怒。內觀。以需藥力。公曰。內觀何爲。主予曰。正心。公曰。儒以正心爲修身先務。每苦工夫無下手處。予曰。正之爲義。一止而已。止於一則靜定。而妄念不生。宋儒所謂主靜。又曰。看喜怒哀樂未發以前。作何氣象。釋氏之止觀。老子之了得一。萬事畢。皆此義也。孟子所謂有事勿正。勿忘勿助長。是其工夫節度也。公曰。吾知止矣。遂上疏請告。予錄前方畀之北歸。如法調養半年。而病根盡除。

孫文垣醫案 卷二 三吳治驗

# 孫文垣醫案

明 新安 孫一奎文垣甫輯

鄞縣 曹赤電炳章圈點

## 卷二

### 新都治驗

瓊兄內傷飲食。外感風邪。洒淅惡寒發熱。煩躁不寧。已經表汗瀉吐之後。小水短赤。口渴。腹中疼。夜不能睡。耳聾氣塞。神魂不安。懊懣不已。予脈之。兩寸滑大。左關弦。右關滑。兩尺皆弦。皆七至。據此。迺少陽陽明兩經合病。仲景云。渴而小便不利者。當利其小便。先與柴苓湯。加竹茹。進之。耳稍聰。稍得睡。熱仍不退。聞食氣即嘔。以濟生竹茹湯。加人參、麥冬、黃連。外與辰砂六一散三錢。服後神稍清。手足心仍熱。用竹葉石膏湯。而熱亦不退。且懊懣殊甚。合目即譫語。按仲景謂傷寒汗吐下後。懊懣不得眠者。熱在心胸之間。宜輕湧之。以梔子豉湯主之。

服後晚間仍不得眠。兩耳氣塞難當。改以小柴胡湯。合白虎湯進之。卽得睡。睡中汗出二次。耳頓通利。因進食早。及發熱口渴。舌上黃胎。此陽明餘熱復萌。乃用石膏七錢。甘草一錢。知母三錢。黃連一錢五分。百合。竹茹各一錢。竹葉三十片。急進而熱全退。始得獲安。

程龍坵翁每行動卽作熱。發渴嘔惡。腰與環跳常痛。脈左沉細。右寸滑。關尺濡弱。此上焦有痰火。下焦有濕熱。治當流濕舒筋。然後施補。先用苡仁三錢。蒼朮。葳靈仙。牛膝。黃柏。烏藥。紫荊皮各一錢。紅花。桂皮。防己各五分。水煎服。外以鹿茸。虎骨。晚蠶沙。仙茅。黃柏。龜板。蒼朮。牛膝。杜仲。蜜丸服之而安。

汪松崗翁原傷於酒。夜分有熱。咳嗽咯血。不思飲食。左脇氣不調。左寸脈亢。關澁。尺弱。右寸短。關滑。此胃中痰火正旺。氣血俱虛。宜先清胃保肺。然後大補。麥冬。知母。寒水石。甘草。紫苑。人參。牡丹皮。白芍藥。當歸。貝母。桑白皮。煎服一帖。紅仍未止。加側柏葉。茅根。四帖而紅止。過後四月。又爲怒氣所傷。血又動。左不能睡。桃仁。滑石。紅花。當歸。人參。貝母。山梔仁。甘草。香附。青皮。牡丹皮。煎服而安。予囑渠令子曰。寄語令堂。諸凡得意事。可與尊翁知之。如不得意者。切不可使之聞。

也。蓋肝爲藏血之所。況血去多。肝火剛燥。心主不足。內經云。主不明則十二官危。不可不謹防之。且左不得眠。肝脹可知。予甚爲尊翁慮。後三年果爲怒復。乃命使迎子。予固辭謝曰。向曾叮囑。今病之來。非不佞所堪任也。不逾旬而歿。族妹經不行者八十日。每飲食入腹卽疼痛。必盡吐出乃止。居常亦吐酸水。上焦熱。下焦寒。大便半月始一行。食飲不進者四十日。六脈皆數。左滑。右軟弱。妹能事者。以其夫多病。且不諳世故。由是悒悒。病從思慮而得。恐成膈症。今大便燥結。吐酸乃膈之徵。急宜拂慮。庶藥有功。先與丁靈丸一粒而吐止。繼用溫膽湯。加大腹皮、薑連。痛吐全安。故以二陳湯加香附、條芩、山梔仁、丹參、砂仁。調理兩月。經行。大便始潤。而膈症斯不作矣。

孫華野脈沉弦而數。喉痛頰車腫。兩太陽作脹疼。遍身皆脹痛。憎寒發熱。乃痰火上壅。而變風熱。將欲作毒也。宜急治之。薄荷、甘草、升麻、白芷、石膏、枳殼、天花粉、桔梗、大力子、連翹、玄參。一帖而愈。

顯兄每辛苦及酒多。則咯血數口。脈兩寸皆短弱。關尺洪數。此胃中有痰火。而下焦有陰火。由壯年酒色所傷故耳。以丹參、滑石各三錢。白芍藥二錢。麥冬、貝母、

桃仁、紫苑、牡丹皮各一錢。當歸七分。甘草五分。煎服而安。

歙邑吳遂兄木商也。在吳興年七十。因冒雨勞力汗出。又以冷水澡浴。因而發熱。口渴。心與背互相脹疼。小水長而赤。舌上黃胎。夜不得臥。眼目如金。皮膚盡黃。吳興之醫見之遠走。不敢措劑。謂其年高不宜此病。讚勸回家。乃敦訪予治。診得左脈浮數。右濡弱。兩手皆有六至。予曰。此濕熱發黃症也。病雖重。年雖高。有是症。當有是藥。毋用倉皇。乃以柴胡三錢。酒芩、葛根、青蒿、香薷、天花粉各一錢。人參七分。粉草五分。連進二帖。晚得微汗。即能睡。次早熱退。其半舌胎稍淡。潤不焦燥矣。胸膈餘熱作煩。身黃如舊。以竹茹、青蒿、葛根各一錢。人參、麥門冬、天花粉、知母各八分。白芍藥六分。二帖熱退。食進。精神陡長。後與補中益氣湯。加青蒿、麥門冬、天花粉十帖。而眼目肌膚之黃盡釋然矣。吳興諸公悉服其精當。各錄方而傳。

族姪文學明之。以作文過勞。痰火上逆。大吐痰沫。因而嘔血。一涌數碗。昏暈汗出。奄奄而臥。略不敢動。稍動即嘔吐而血隨出。色鮮紅。飲食湯水皆不敢入。入即吐而眩暈。血即隨之。里有蔡君程聞野氏爲之診。駭而走曰。血如涌泉。體熱脈

大眩暈而藥食難入。似無佳兆。乃速予治。予診視畢。語其乃兄。勉之曰。可生也。何舉家張皇若此。勉之以程言告余。余曰。看症要圓活。勿拘泥。據經云。心主血。肝藏血。二曰。怒則氣上。又曰。脈虛身熱。得之傷暑。今左脈弦大。右脈虛大。明之不獨作文勞心動火。且亦被怒傷肝。抑又爲暑所逼。以致木火上升。弦運作吐。經曰。諸風掉眩。皆屬肝木。諸嘔吐逆。皆屬於火。又諸動屬火。內爲木火上衝。外爲暑氣所迫。故吐而汗多。血隨吐出也。醫貴識病。有是病則有是藥。予特以白丸子三錢。解其暑氣。清其痰飲。抑其衝逆。則吐可止。吐止氣平。則血自能歸經。腹後果嗒然而睡。醒則吐止食進。眩暈尋已。繼用滑石、香薷各三錢。甘草五分。黃連、白扁豆各一錢五分。竹茹一錢。四帖全安。

從嫂程氏。年近五十。患咳嗽吐臭膿血。一日夜一椀餘。發熱晝輕夜重。肌肉大瘦。六脈浮而洪滑且數。人皆謂嘔血身熱脈大。法在不治。予曰。此非嘔血比也。此係釀酒傷肺。又爲怒氣所觸。瘀血濁痰。滯於肺之氣竅。無從而出。久之化而爲膿。成肺癰也。治宜開肺竅。活血化痰。使膿盡當自愈也。諸人治之二年不效。予教以白芍、薏苡仁各三錢。牡丹皮、桔梗、茜根、歸尾、山梔子、貝母、白芍藥各一錢。

甘草、葶藶子各五分。三十帖全愈。後壽七十三。以他病而終。此疾再不復發。

族姪媳葉氏。年三十。身面四肢浮腫。漸而入腹。腹大不可言。眼泡腫而無縫。飲食大減。小水不利。此滯氣水脹也。以大腹皮、茯苓皮、薑黃、蒼朮、厚朴、澤瀉、木香、烏藥、陳皮。服三劑而眼目能開。飲食稍進。卽爲食傷而復腫。予改用七傷丸。調理全安。

族姪孫伍仲立年。善飲好內。小便血淋疼痛。予以滑石、甘草梢、海金沙、琥珀、山梔子、青蒿、茅草根。煎膏爲丸。梧桐子大。每空心及食前燈心湯送下三錢。不終劑而愈。後五年。因子遲服補下元藥過多。血淋又發。小便中痛極。立而不能解。必蹲下如婦女小解樣。始能解出。皆大血塊。每行一二碗餘。如是者半月。諸通利清熱之劑。靡不遍嘗不應。脈俱洪數。予以五靈脂、蒲黃、甘草梢各二錢。小薊龍、牙草各三錢。水煎空心服。二帖而痛減半。血仍舊。改用壟麥、山梔子、甘草各二錢。茅根、杜牛膝、連葉車前草各三錢。生地黃、柴胡、黃柏、木通各一錢。四帖痛全減。血全止。惟小便了而不了。六脈亦和緩不似前矣。後以人參、葛根、青蒿、白朮、茯苓、甘草、白芍藥、升麻、黃柏、知母。調理萬全。



令眷辰州太守石峰公女也。吐紅發熱。經水二十日一行。或一月行二次。白帶且多。胸膈飽脹。脈洪數。以丹參、生地、山梔子、白芍藥、小薊、鹿角膠。水煎。臨服加入童便一盃。酒二十劑而瘳。

亮卿令媛。右目紅腫。如腹中飽。眼乃能開。飢則眼不能開。此疳積虛寒症也。以夏枯草二錢。甘草、穀精草各一錢。香附一錢五分。煎服四帖而安。

姪孫少竹。太學生也。眼紅腫脹。余雲谷以苦寒治時疾之劑與之。眼愈腫。且增兩太陽痛。前藥中再加石膏。不惟眼腫不消。頭痛不止。且令遍身脹悶。寢食俱廢。予爲脈之。弦大而無力。乃用蔓荊子、桑白皮、柴胡、香附、夏枯草、甘草、芽茶一帖而痛定。兩帖腫消。四帖全瘳。

一僕婦產後惡露不盡。腹中作痛。且冒風咳嗽。嘔吐頭暈。脚麻木不知痛痒。亦不能轉側。與糖毬子、紫蘇、旋覆花、烏藥、五靈脂、茯苓、川芎、當歸、澤蘭葉、玄胡索。加沙糖煎服而痛止。再進惡露行。咳嗽嘔吐皆愈。

上舍程好吾公令孫。右耳後生一毒腫痛。遍身生大泡瘡。憎寒發熱。與金銀花、當歸尾、甘草、赤芍、連翹、僵蠶、大力子、玄參。兩劑而消。

華岳令堂年五十餘。向來小水短少。今則右背鹽匙骨邊一點痛。夜尤痛。已經半月。醫治不效。展轉加劇。卽於右邊手臂肢節皆脹痛。筋皆暴起。肌肉上生紅點。子脈兩手皆滑數。右尺軟弱。乃濕熱傷筋而成痛痺。以東垣舒經湯爲主。羌活、升麻、桃仁、麻黃、紅花、當歸、防風、甘草、獨活、猪苓、黃柏、防己、知母、黃連。兩帖痛減。腫消。再亦不發。

由溪程兩峰丈內人。患血痢。裏急後重。嘔吐不納穀。兩寸脈洪大。以竹茹溫膽湯。加薑連、滑石、橘紅、酒芩。水煎服二帖。大便結實。膿血皆止。惟後重。與枳殼、當歸、芍藥、生地、桃仁、條芩、甘草、滑石、酒連。四帖全安。

由溪程七護兄。臍腹右邊疼痛。小水短少。大便四日未行。嘔吐不能進食。舌上白胎。面青手冷。勢甚危急。脈之左沉伏。右滑大有。予曰。此痰格中焦。氣閉下焦。故大小便秘而不利。氣逆嘔吐也。不急治。卽無救矣。與柏樹東行根皮二錢。滑石三錢。桃仁、青皮、枳實、檳榔各一錢。水煎服之。夜半吐出膠痰碗餘。大便未行。痛亦不減。次日改用玄胡索五錢。水煎服。調下玄明粉三錢。辰刻服下。午刻痛減大半。未刻大便始行。右脈平而左脈起矣。覺體倦無力。以生脈散。加甘草。

山梔仁、黃柏、芍藥、苡仁、陳皮。調理如故。

由溪程社貴兄。先醉酒。後御色。次早四肢冷。胃脘痛極。脈僅四至。先醫以鬱火爲治。投以寒涼。痛更增極。三日前所食西瓜。仍吐出不化。乃翁以爲陰症傷寒。欲用附子理中湯不決。逆予治之。予觀其面色青慘。叫痛而聲不揚。坐臥煩亂。予曰。此霍亂兼虺厥症也。先當止痛安虺。後理霍亂。可免死也。遲則誤事矣。急用五靈脂醋炒三錢。蒼朮一錢五分。烏梅三枚。川椒、炮薑、桂心各五分。水煎飲下。痛減大半。下午以大腹皮、藿香、半夏、陳皮、山查、五靈脂、茯苓兩帖全安。

汪松崗令眷。左脇疼。咳嗽內熱。每嗽則脇下弔痛。寢食大減。與青皮、香附、甘草、芍藥、訶子、山梔子、貝母、茯苓、柴胡、桃仁、滑石、人參。水煎飲之。熱除痛減。

文學贊皇令堂。產後左脇痛甚。咳嗽痰不易出。內熱氣壅。不能伏枕。予以瓜蒌仁六錢。桑白皮、紫蘇子、杏仁、半夏、桔梗、枳殼各一錢。水煎服之。而氣壅定。嗽漸減。除。外與保和丸。及七製化痰丸而安。

許少峰。胃中有痰。肝膽經有鬱火。心血不足。面色黑而枯燥。肢節疼痛健忘。精神恍惚內熱。將有中風之兆。左寸細數。關弦數。右關重按滑。兩尺弱。治宜清肝膽。

之鬱火。而養心神。消胃中之痰涎。而生氣血。使神帥氣。氣帥血。氣血周流。經絡無壅。則諸疾不期愈而自愈矣。何中風之有哉。用石菖蒲、黃連、白茯苓、半夏、酸棗仁、天麻、橘紅各一兩。牛膽、南星二兩。白僵蠶、青黛、木香各五錢。柴胡七錢五分。竹瀝、生薑汁打神麵糊爲丸。菘豆大。每食後及夜茶湯任下二錢。一日二次服完。神氣大健。肢節皆舒。面色開而手足輕健。種種皆瘳。少峰曰。吾生平服藥少效。不期此方之神若是。不惟自服有功。卽諸親友有痰火者服之。莫不響應。

朱宅女眷。經水行一月不止。每黃昏先寒後熱。遍身疼痛。胸前脹悶不通。必欲大喊叫嘶。用手於喉中幹而吐出痰涎乃寬。今且渴甚。此痰飲癘疾。今飲食不進。夜如見鬼者。乃熱入血室也。用小柴胡湯加生地黃、丹皮、陳皮、桃仁兩帖。後以白朮三錢。何首烏二錢。陳皮、麥芽各一錢。烏梅一枚。生薑三片。水煎服之。而寒熱止。諸症皆安。

孫熙宇肢節腫痛。痰多嘔惡。胸中氣不暢達。語言亦不清利。夜夢皆亡人野鬼。追陪情神慘惡。驚恐不安。且汗多不止。飲食減三之二。遠近名家醫治。逾月不應。

敦予爲治。診其脈左手甚弱。汗多故也。右手滑大。痰飲溼熱而然。法當補斂。前醫皆作風治。而用疎散洩其元神。將成柔瘥。予以人參、麥門冬、五味子、白芍藥、當歸、苡仁、陳皮、石斛、木瓜、甘草、白朮、桂枝。服此汗大斂。而神思稍清。吐亦止矣。惟飲食不思。夜夢與亡人同遊爲惡耳。改用人參、黃耆、枸杞子、苡仁、白朮各一錢五分。當歸、遠志、茯苓、木瓜、陳皮各一錢。甘草五分。水二鍾。入雄豬心血一枚。煎作八分飲之。四帖乃能睡。始夢生人不復夢亡人矣。

愛泉上年十月。因傷風咳嗽。卽時聲啞。繼聞父喪。過憂。右邊不能貼席而睡。醫以滋陰降火之劑治之。半年。肌肉大削。大便秘瀉。飲食減少。咳嗽聲啞有加。喉且疼痛。迎余爲治。診得六脈俱弦數。此憂傷肺。思傷脾症也。危急甚矣。以白朮、茯苓、陳皮、粉草、苡仁、桔梗、柴胡、桑白皮、酒炒白芍藥、澤瀉、麥芽、山查煎服。一日。再以荆芥、桔梗、玄參、甘草、茯苓、白芍、酒連、扁豆、山藥、山查、木通。服此而右邊可睡矣。改用參苓白朮散。加白芍藥、烏梅、訶子、酒連、山查。調理而愈。

姪婦戴氏。有孕已五月矣。忽血大下。午後發戰。六脈俱數。左寸滑大。右關搏指。左關軟弱。予以白芍藥二錢。生地、阿膠、人參、蒲黃各一錢。柴胡、香附、地榆、荆芥穗。

各七分。甘草五分。煎服。午後發寒熱。每夜凡三次。頭痛惡心。腹中塊硬。所下血塊甚多。心下怯力。此虛無疑也。以補中益氣湯。加阿膠、炮薑、白芍藥、烏梅煎服。下午右眼白珠發一白泡。光腫下垂。而面赤腫。此虛火遊行無制之症。其夜大發寒熱。指爪皆黑。唇白。汗大出。腹中作痛牽引。兩乳皆痛。仍以補中益湯。加阿膠、白芍藥、桂枝、五味子、麥冬。服後熱退汗止。渴除。神氣稍定。乃有生意。次日咳嗽而胎墮。即以獨參湯繼服。其夜腸鳴瀉二次。以人參、白朮各三錢。炙甘草一錢五分。炮薑一錢。桂心、茯苓各五分。陳皮七分。蓮子、大棗煎服。後因咳嗽。以四君子加炮薑、五味子、紫苑調理而愈。

靈岳乃眷。胃脘疼痛。手心熱。頭暈舌麻。兩太陽痛。背心亦脹。內熱而外惡寒。必厚被蓋覆。得微汗迺解。二陳湯加桔梗、杏仁、桑白皮、枳殼、青皮、白芥子、蘿蔔子、酒芩。煎服兩帖。舌竟不麻。晚因食雞過多。膈上氣滯。二陳湯加蘿蔔子、枳實、山楂、川芎、香附、酒連調理全愈。

歙溪南吳人峰先生內人。兩脇脹急。抵於胃脘作痛。痛一陣。則汗出一番。兩顴紅。脣口亦紅。飲食湯水。飲之立吐不受者。三日夜矣。予爲診之。兩寸脈洪大。兩尺

沉微。予以井水半碗。白滾湯半碗和之。名曰陰陽湯。用此調玄明粉一錢五分。服之不惟不吐。痛減半矣。少頃。大便秘行二次。因食豆腐及粥太早。而痛復萌。脣臉皆紅。此必有蟲。故如是也。與白芍藥、桂枝、粉草、烏梅、花椒、五靈脂、杏仁水煎。痛乃定。其大半再與蒼朮、厚朴、山查、枳實、茯苓、玄胡索、香附一帖全止。但心背皮膚外疼。不能着蓆而睡。以川芎、當歸、白朮、厚朴、大腹皮、粉草、茯苓、香附、陳皮、半夏調養全愈。

陳鐵兄內人產後腹痛發熱。下痢膿血。裏急後重。川芎一錢。當歸三錢。茯苓、乾薑、肉桂、山查、陳皮、酒炒白芍藥、白朮各一錢。粉草五分。一帖而腹痛止。痢輕。後重亦除。惟發寒熱多汗。改用人參、白芍藥、桂枝、粉草、川芎、當歸、白朮、茯苓、香附、陳皮、山查再劑而諸症如釋。

程石洲乃眷。因產難子死憂悶。小腹有塊作痛。下午發熱。不思飲食。次早診之。脈右大於左者三倍且數。與芍歸湯加糖棊子、澤蘭葉、肉桂。次日下午。腰腹脹痛。詰之。晌午食圓眼一斤矣。從此小腹漸脹。大便三日未行。早晨鼻衄。夜間極熱。口渴。脈大無緒。勢甚危急。用川芎、當歸、紅花、桃仁、青皮、檳榔、莪朮、山查水煎。調

玄明粉二錢。服後大便稍行。結糞二枚。安而就寢。醒後進粥稍多。又復脹痛。腹大如斗。堅如石。氣促不安。勢危至此。亦已極矣。迺與五靈脂、糖毬子各四錢。凌霄花二錢。赤芍藥一錢。服後大便通。腹軟氣定。始可進粥。漸有生氣。但脈仍鼓指。此腹中積滯尚多。不可不因其時而驅去也。用糖毬子、大黃各三錢。桃仁二錢。桂心、紅花各五分。炙甘草七分。水煎。臨服調玄明粉一錢五分。其夜下黑糞四次。熱始退。上腹雖消。臍下仍大。仍以桃仁、承氣、加山查、滑石、紅花煎飲之。五更大便行。臍腹脹又漸減。後與積塊丸調理全消。是役也。女流只知女科專門爲仗。故前發熱腹痛之時。彼專門不察虛實。卽以常套十全大補湯投之。詎知圓眼肉初入腹之時。不覺少頃。漸脹開。故腹亦因之而脹也。且其味甘。尤能作滯。復加地黃、參、朮。寧不塞其塞哉。由是而成大滿大堅之症。內經謂中滿者瀉之於內。良以此夫。彼亦泥乎丹溪產後須當大補氣血之誤也。

程宅一老嫗。年八十餘。常頭暈脚軟。撐載上身不起。行須人扶。否則眩暈跌仆。大便澹洩。小水淋瀝。此下元虛憊所致。以人參、黃耆、白朮、薏苡仁各二錢。山茱萸、杜仲、茯苓各一錢。陳皮、山藥、粉草各八分。入帖而愈。



文學程道吾先生令眷。夜爲夢覺所驚。時常暈厥。精神恍惚。一日三五發。咳嗽。面色青。不思穀食。日惟啖牛肉脯數塊而已。時師屢治無功。吳渤海視爲寒痰。作厥。投以附子肉桂。而厥尤加。逆予爲治。診左脈弦。右脈滑。兩寸稍短。道吾先令眷二皆卒於瘵。知其爲傳屍瘵症也。不易治之。迺權以壯神補養之劑。消息調理。俟飲食進。胃氣轉。始可用正治之法。姑用人參、茯苓、柏子仁、石菖蒲、遠志、丹參、當歸、石斛。以補養神氣。以陳皮、貝母、甘草、紫苑。化痰治嗽。服半月而無進退。迺爲製太上渾元丹。藥用紫河車一具、辰砂、鱉甲、犀角各一兩、鹿角膠、紫石英、石斛各八錢、沉香、乳香、安息香、茯苓、紫苑、牛膝、人參各五錢、麝香五分、煉蜜爲丸。赤豆大。每早晚鹽湯或酒送下三十六丸。又製霹靂出獵丹。藥用牛黃、狗寶、阿魏、安息各一錢、虎頭骨五錢、啄木鳥一隻、獼爪一枚、敗鼓心、破皮三錢、麝香五分。天靈蓋一箇。煉蜜爲丸。雄黃三錢爲衣。每五更空心。葱白湯送下五分。三五日服一次。與太上渾元丹相兼服。纔服半月。精神頓異。不似前時恍惚矣。但小腹左邊一點疼。前煎藥中加白芍藥一錢。服之一月。精神大好。暈厥再不發矣。次年生一女。其宅瘵疾從此再亦不傳。

一僕婦年三十。患瘟疫一月餘矣。非勞復卽食復。今則發熱咳嗽。胸脇疼。耳聾口渴。大便七八日不行。不知人事。迺與柴胡、石膏各三錢。瓜蒌、桔梗、枳殼各一錢五分。黃芩、前胡各一錢。天花粉八分。甘草五分。黃連八分。急煎服之。人事稍知。因大便不行。次日以大柴胡湯下之。又次日大便雖行。熱仍不退。改以柴胡二錢。白芍藥、黃芩、麥門冬各一錢。天花粉、茯苓、甘草各六分。四帖而愈。

參軍程方塘翁。年六十四。向以殭胤服溫補下元藥太多。冬月下身着單袴。立溪邊督工受寒。致筋骨疼痛。肩井缺盆脚膝跟踝手肘掌後。及骨節動處。皆紅腫而痛。臥床褥三年。吳中溪視爲虛。而用虎潛丸。吳渤海視爲寒。而用大附子、肉桂、鹿茸。徐東臯認爲濕。周疇認爲血虛。張甲認爲風。李乙認爲歷節。百治不瘳。腿間大肉盡消。惟各骨節處腫大而疼。予適在程道吾宅。迺逆予診之。其脈弦澀有力。知其爲溼熱痰火。被寒氣凝滯固澀經絡也。節爲藥劑不對。故病日加。所取者。目中精神尙在。胃氣仍未全損。但小水解下。以瓦盆盛之。少頃則澄結爲砂。色紅而濁。兩膝下及脚指皆生大瘡。瘡靨如靴釘狀。此皆平昔服溫補春方所致。病雖久。年雖高。猶爲有餘之疾。不可因高年疾痼。棄不治也。迺特爲先

驅逐經絡中凝滯然後健脾消痰俾新痰不生氣血日長最後以補劑收功斯得矣。翁生平好補畏攻故進門者皆務迎合予獨反之以新取葳靈仙一斤裝新竹筒中入燒酒二斤塞筒口刮去筒外青皮重湯煮三炷官香爲度取出葳靈仙晒乾爲末用竹瀝打糊爲丸。梧桐子大每早晚酒送下一錢一日服二次五日後大便瀉出稠粘痰積半桶腫痛消去大半改以人參石斛蒼朮黃柏苡仁蒼耳子牛膝烏藥蕪龜板紅花犀角屑木通煎服二十帖又用前末藥服三日又下痰積如前之半仍以前煎藥服半月又將末藥服三日腹中痰漸少乃爲製丸藥以虎骨晚蠶沙蒼朮黃柏丹參杜牛膝莖葉苡仁紅花五加皮蒼耳子龜板酒打麵糊爲丸梧桐子大每空心白湯送下七八十九外以丹溪保和丸食後服半年全愈腿肉復完步履如故。

汪省吾暮秋患瘧三日一次發於夜迨次年仲春猶不能止遍身疼頭疼背脊疼百治不應卽灸亦僅止得一日次日仍發面色青肌肉瘦以症參之邪在足太陽經用麻黃一錢五分人參桂枝白芍藥粉草知母各一錢陳皮貝母各七分薑棗煎服諸疼減半而瘧未止以何首烏白朮各五錢青蒿一錢烏梅一箇陳

皮二錢。生薑三大片。水煎。臨發日五更服。尋常以六君子湯。加黃耆、柴胡、五味子、烏梅、草果。調理而愈。

汪東之丈。七月初旬自浙歸。連日與客手譚過勞。口中生瘡。醫以香薷飲、清胃湯、瀉黃湯、三黃丸、黃連解毒湯、白虎湯、涼膈散。凡治上焦熱症之劑。竭寒涼而進之者。十一日矣。口瘡日甚。一日不但飲食不進。卽藥亦難下咽。因瘡延及於喉也。逆予爲診。其脈六部俱豁大無力。診罷有外科陳氏者。自稱喉舌專門。銜其口疳敷藥之妙。予曰。汝試爲口中一洗。看是何狀。纔開口。見涎沫迷漫。不能得見肉色。陳以荊芥湯洗而引之。攪出稠涎一二椀。餘傾於地上。偶有二雞爭啄之。二雞立斃。其毒何如此。亦疾之奇者。予囑陳曰。汝用藥只可吹入喉中。切不可敷其舌。必候喉中全好。然後敷舌。特舌好。再敷口脣。其毋得概敷。恐毒無出路。反攻入喉。極爲誤事。陳曰諾。予對乃翁曰。令郎之疾。迺虛陽口瘡也。翁曰。當用何劑。予曰。附子理中湯。煎熟待冷。飲之可救。如他藥不能立功。翁曰。瘡乃熱症。况上身已熱。又天時酷暑。大熱之劑。其敢進乎。予曰。此陰盛格陽之症。初未嘗如此。因服寒涼過劑。激之使然爾。翁不看其兩足膝下皆冷乎。翁用手探足

下果冷。乃欣然聽用人參、白朮各三錢。大附子、炮薑、炙甘草各一錢。水煎冷與之。服後卽鼾睡。達旦。次早便能食粥半盞。足膝下漸暖。藥仍如前。早飯後。予與二三友。數步山溪。午刻歸來。乃見舉家大慟於地。見予至。哭語予曰。不可爲矣。本是熱病。誤服熱藥。今舌腫大塞滿口中。不能言語。死在頃刻。奈何奈何。予駭然。應曰。安時有是不祥語也。今晨診脈與昨不二。適往返不過二時許。何倏爾有此大變乎。待予再診決之。及診六脈漸斂。較昨大有神氣。面色亦和。獨舌脹大。予心知爲陳寒涼敷藥所致也。迺詰陳曰。我別後可用敷藥否。陳點首曰。已二次矣。予撫翁及諸人曰。無慟。立看予爲翁消之。急取官桂研末五錢。用生薑自然汁調塗舌上。纔塗上。但見眼淚雙流。鼻中涕出。口出涎垂。舌頓消去。語近侍曰。我無事矣。諸環侍者男婦不下二十。皆面面相覷。以爲神奇。予曰。可卽取粥與食。使壓之。庶虛火不再升。適舌脹滿者。乃敷藥寒涼。閉其毒氣。毒無從出。故作脹耳。桂皮乃辛熱之物。又以薑汁調塗。取辛散之義也。諸人皆服其論。東之丈令眷。妊已六月。爲傷風咳嗽。腹中弔疼。痰壅。喉音不清。頭且眩暈。脈左滑數。右寸弱。關滑。左尺有力。右尺弱。予以人參、白朮、陳皮、貝母、茯苓、桔梗、桑白皮、

紫蘇、粉草、黃芩、前胡、四帖而病全愈。

吳東渠年五十又七。因上年患瘧。胸痞作脹。肌肉大削。因連服攻剋太重。脾胃敗壞。膝及跟踝皆浮腫。遍身發熱口渴。小水短赤。舌上黃胎。舌心焦煤乾燥。誤服寒涼。大便連瀉五六次。目不能開。手足無力。倦於言語。予診之。六部俱浮大。按之豁然空虛。飲食不進。此中氣大虛。元神俱脫。可畏之甚。即以人參、白朮、茯苓、粉草、木香、葛根、酒炒白芍藥、水煎服之。連進二帖。始能開目。漸出聲言語。後以六君子湯去半夏。加葛根、白扁豆、山藥、藿香、苡仁、白芍藥、石斛調理而愈。

吳西源令眷。因未有子。多鬱多思。肌肉漸瘦。皮膚燥揭。遍身生瘡。體如火燎。胸膈脹痛。而應於背。咳嗽不住口。醫治十越月。僉以爲瘵疾不可治。知予在程方塘宅中。迺迓予治。診得右寸關俱滑大有力。左弦數。予以瓜蒌仁、四錢、蘿蔔子、貝母、枳殼、調氣化痰開鬱爲君。桑白皮、葶藶子、黃芩、瀉肺火爲臣。甘草、前胡爲使。三十帖全愈。仍以千金化痰丸調理。向來年年至冬月則咳嗽痰喘不能睡。自此後遇冬月痰再不復發。

族嫂程氏。環跳穴邊腫痛。憎寒發熱。不能動止。寢食俱廢。頭重惡心。上身熱。下身

冷。天明乃退。口乾。舌上白胎甚厚。以柴胡、防風、桂枝解其寒熱。以蒼朮、黃柏、五加皮、桃仁、赤芍藥治其痛。木通利其濕熱。且引火下行。甘草調和諸藥。使各得職。一帖而痛止大半。再進寒熱除。三帖痛全減去。改以小柴胡湯加牡丹、枳殼、桔梗。二帖而舌胎脫然。

上舍恆宇先生。原因生楊梅瘡後。偶遭一跌。環跳脫出不能復入。窠臼疼痛殊甚。兩足因長短不齊。予思不能復入。窠臼者。以瘀血流入窠臼。占滿故竅。致骨不得復入也。今但消去瘀血。必以行氣活血之劑為主。以下行嚮導之劑佐之。庶可復原。用陳年窖中磚瓦。洗淨煨過四兩。生地、杜牛膝、骨碎補、丹參、赤芍各一兩五錢。自然銅三兩。蒲黃、車前子、蘇木各一兩。鹿角二兩。玄明粉五錢。各爲末。以茅草根一斤。紅花四兩。煎膏拌晒前藥。再以煉蜜爲丸。梧桐子大。每空心及食前酒送下八九十九。未服此藥之先。病足長二寸餘。服此丸藥後。只差半寸。設再製久服。必能萬全。惜渠素畏藥。中道而止。故功虧一篑也。豈勝嘆哉。

族姪孫女一週歲時。發慢驚。眼開手拳。目不動移。脚指微動。先自顛門後遍身如火。喉中痰聲。口中痰沫。腹脹放屁。大便亦行。先以牛黃丸、蘇合香丸進之不效。

及各治驚治痰等藥。與之皆不受。即從痰沫流出。用通關散吹入鼻中。亦不作。噫。自申時至戌時。猶不能醒。面色素青而白。氣稟甚弱。因婢者抱而偶失跌。受驚發熱。此驚氣乘虛而入。在法已無生路。但不忍坐視。姑以人參三錢。生薑自然汁拌炒。煎湯。頻頻用匙挑入口中。初二三四匙皆不受。後又與五六匙。偶能入一二匙下喉。便覺痰聲稍緩。因此頻頻與之。十匙之中。有二三匙入腹矣。喉中氣轉。目便能動。始有生意。再以六君子湯。加天麻、石菖蒲、殭蠶、澤瀉、薄荷煎服。至雞鳴時。乃略啼一二聲。方識吮乳。次日咳嗽。語聲不出。小水短少。以辰砂益元散一錢。用燈心湯調下。熱退聲出。惟嗽不盡止。改以四君子湯。加陳皮、五味子、麥門冬、桑白皮、桔梗、杏仁、薄荷。一帖全愈。

程少湖因飲生酒。食硬乾豆腐。以致次日面上浮腫。胸中作脹。今經半年。腹中腸鳴。四肢浮腫。兩腿及陰囊皆腫。口乾。大小便俱不利。年四十六矣。夜臥氣喘。膝下冷。先以人參、蒼朮、陳皮、蘿蔔子、半夏、麩、葛根、厚朴、枳實、破故紙、大附子、茯苓煎服二帖。氣喘稍定。腹中仍鳴。加白荳仁、白芥子、桑白皮。小水頗利。浮腫漸消。吳斗一文。歙溪南人也。八月初旬。自新都往湖州。途次偶感風邪。發熱多痰。且又



腹痛下痢。裏急後重。原有腸風下血之疾。又以舊年乃翁痢疾發熱。卒於湖州。心甚恐怖。予脈之。兩鬪滑大有力。尺寸俱不足。乃以白芍藥一半生一半酒炒。五錢止痛爲君。當歸活血。酒連、酒芩、柴胡、桔梗清熱升提。陽氣爲臣。枳殼、槐花兼治腸風爲佐。益元散、木香以實大腸。山查以消瘀血。調肝安脾爲裨佐。一帖熱減半。痢稍輕。次日仍用前藥。外與丹溪保和丸。調理五日而出戶。

姪孫二水年三十。體甚肥胖。夏月常浸在溪中。臥於松陰之下。至八月大發寒熱。於巳午間至天明乃退。不能起床。飲食亦不進。嘔吐黃苦膽汁。胸膈脹悶。舌上乾燥。生芒刺。沉香色。強硬不能言語。必含冷水漱之。始能說一句。若再語三語。必三噲水而後可。惟西瓜新藕是啖。先發寒熱之日。吐血一口。今則大便下血。症甚危惡。且咳嗽。此溫瘧症也。由醫失解散。遽用黃耆以閉邪氣。致成大禍。今法當清解止吐。俾飲食進。然後庶可保其生也。柴胡、知母各三錢。石膏七錢。葛根二錢。橘紅、竹茹各一錢。五分。酒芩、枳實各二錢。甘草、貝母各五分。水煎服之。三帖而吐止。改用二陳湯。加柴胡、枳實、黃芩、黃連、天花粉、鱉甲、白朮、何首烏。調理而愈。迺囑其不可食葷。食葷早恐復發也。

堪輿張錫泉先生患左脇皮裏膜外疼痛。有惡寒發熱之狀。以白芥子一錢五分。川芎、柴胡、桔梗各一錢。桂枝、甘草各五分。水煎飲之。當愈其半。次日以八珍湯加青皮爲君。木香爲佐。柴胡爲使。一帖全愈。

族姪雲岳患偏墜。臍腹腰俞俱脹而痛。左關脈弦大鼓指。用小茴香、甘草、蒼朮、益智仁、防風各五分。荔枝核、橘核、糖棗子、柴胡各一錢。山梔子、青皮各七分。服後其痛如舊。脈且轉數。恐作囊癰。急爲解毒。瓜蒌五錢。當歸、甘草節、金銀花各一錢。連翹、柴胡、青皮各七分。水煎服之。痛定腫消。因食雞魚太早。次日臍腹又作脹痛。發熱不能睡。昨日囊消。後弦脈盡退。今復弦矣。改以山查、瓜蒌各二錢。金銀花、柴胡、連翹各八分。甘草節、黃連、當歸各五分。青皮七分。兩帖而愈。

一婦時方妙齡。表虛易感風寒。致成鼻淵。流清涕不止。便覺頭暈。兩太陽常作痛。且多噴嚏。脈之兩寸洪大。用秦艽、酒芩、桑白皮、馬兜鈴各八分。白芍一錢。滑石、石膏各二錢。枳殼、蔓荊子各五分。甘草三分。四帖涕止病愈。

程雨峰丈。偶與乃姪稍有介蒂。其晚飲於姪家。歸覺腹中脹懣。嘔噦不寧。次日眼珠面色皆黃。惡寒發熱。時當仲秋。正瘧痢爲癘之候。醫作瘧治。五心加熱。下午

潮熱煩躁。似嘔不嘔。且鼻衄腹痛。大便黑如墨。吐出黑血。如爛猪肺者然。約碗餘。有謂所吐之物如此。大便之黑。又如彼。似有中蠱之象。心疑乃姪毒之也。正欲與乃姪爭辯。予仲子泰來適在渠宅。徐語渠諸郎君曰。尊翁症尙可起。顧不爲救症。而務與人鬪。何舍重而圖輕耶。渠家素不急予。仍迂所親信者。率相視之。見明珠如金。面若熏橘。腹大如斗。其中有塊大如椽。堅如石。兩足下皆浮腫。四肢且冷。小水赤。飲食不思。莫不面面相覷。辭而不藥。舉家聞言。通宵號泣。惟欲攘臂爭鬪。仲子泰來又語之曰。家君固不敏。其知識量不出諸公下。昨自華陽歸。迂而診之。當必有說。舉家忻然。敦予求診。其脈左濡右滑。予曰。據滑脈主痰飲。濡主有瘀血也。今所吐所下皆瘀之徵。斷非蠱也。使得早從事。曷有此猜忌。此號泣哉。兩峰曰。吾生平頗謹疾。瘀自何致。予曰。內經云。怒則傷肝。甚則嘔血。不嘔則積。積而瘀於經隧。滿而溢也。兩峰曰。苦謂從怒而致。則此語恰當。吾病源矣。敢請劑。予用當歸尾三錢。赤芍藥。牡丹皮。川芎各一錢。五分。玄胡索。五靈脂。桃仁各一錢。滑石。茜根各二錢。水煎飲之。所下黑物甚多。腹中仍痛。塊猶未軟。前方再加青皮。山查。酒蒸大黃服之。大便行三次。黑瘀及痰不計其數。從

此腹漸寬。塊漸鎔。面色稍轉。而黃日退。飲食津津有加。四肢微溫。有生氣矣。惟兩足浮腫不消。改用六君子湯。加炮薑、茜根、滑石、青蒿調理。而黑糞全無。三月精神復舊。里中謂予此役匪獨認病投劑爲足稱。且俾二宅釋猜疑。排忿爭。其雅誼尤足重也。

予有表嫂小產後。腹痛暈厥。冷汗淋漓。遍身麻木。心怔怔動。左脈絕不應指。虛極故也。以當歸三錢。川芎一錢五分。人參、荆芥穗、燈火燒存性各一錢。益母草、澤蘭葉各八分。甘草五分。水煎飲之。腹痛減。惟怔怔不寧。以四君子湯。倍加黃耆爲君。當歸、香附、益母草爲臣。川芎爲佐。炮薑爲使。兩劑而安。

陳士美。孤子也。年弱冠。由夢遺後。患頭疼發熱。時值仲夏。醫治不瘳。凡市中有名者。率延致。轉治轉熱。及加水瀉。口渴。晝夜不得眠者旬日。衆視爲危。時有俞氏者。用參耆。白朮爲其斂汗止瀉。而汗瀉愈劇。呻吟不間晝夜。勺粒不入口。咳嗽胸痞。躁悶不寧。又四日矣。渠親邵瓊林交予。因浼邵逆予爲治。診其脈。左弦長。右洪大。俱七至。舌胎焦黃。體若火燎。神昏氣促。予曰。此仲暑傷寒熱症也。邪在陽明。少陽二經。其危不啻風中燭。胡時師不認症。察脈徒以夢遺受病。率投補

劑。無怪乎轉治轉劇也。幸予至。設遲一日。大事去矣。用石膏五錢。柴胡、知母各三錢。炙甘草、白芍藥、枳殼、桔梗、黃芩、天花粉各一錢。粳米一撮。急煎飲之。夜半熱稍退。神稍靜。脈之仍數甚。繼以前劑進。天明。乃得睡覺而熱退。神清瀉止。膈寬。惟口尚渴。再用柴胡一錢五分。白芍藥、麥門冬、知母各一錢。石膏三錢。甘草、五味子各五分。人參七分。服之。舌潤渴止。餘熱盡退。粥飲始入。漸向安矣。次日忽兩足指前一截痛如犬嚙。不能耐。以野蓼一握。入明礬四兩。煎湯熏洗。痛勢稍緩。又以薏苡仁三錢。木瓜二錢。黃柏、牛膝各一錢。漢防己三分。一帖而愈。後又乾咳嗽。晝夜不住口。喉且疼。胸脹而體略熱。此爲誤服參朮太早之過。用馬兜鈴、百步御米殼。各用蜜水製過一錢。五味子、甘草各五分。百合二錢。四帖而愈。

程松逸兄患酒疸。遍身皆黃。尿如蘖汁。眼若金裝。汗出沾衣如染。胸膈痞滿。口不知味。四肢痠軟。脈濡而數。以四苓散加厚朴、陳皮、糖菴子、麥芽、葛根。倍加青蒿水煎。臨服加萱草根自然汁一小酒杯。四帖。其黃渙然脫去。

太學岐原門下幹人。名仲諫者。患跨馬癱。大發寒熱。紅腫疼痛。嘔惡不納飲食。外

科醫月餘。腫痛日加。飲食日減。肌肉日消。精神大憊。不能起止。岐原邀予脈之。六部數而無力。形氣殊不勝息。時有專科唐氏。爲渠調劑將進。予詰何劑。唐曰。真人活命飲也。曾服四劑。今始加大黃。予復詰曰。前此何劑。唐曰。敗毒散。黃連解毒湯。予曉之曰。此皆治初起有餘之疾。據今症乃氣血大不足者。法當大補。託而出之。庶保終吉。唐曰。凡痛爲實。痒爲虛。今痛正盛。脈正數。飲食且不進。大補必加飽悶。飲食何由進。熱毒何由出也。正予色語之曰。素問云。數脈所主。其邪爲熱。其症爲虛。今痛極者。皆由寒涼敗毒之劑。傷脾胃。凝氣血。故飲食減而痛增也。又以敗毒之劑進。是鳩之爾。安望膿出而全其生乎。唐曰。補劑迨膿潰之後。或因膿清而後用之。今膿未出。安可謂虛而補之。吾爲專門。不敢任其責。予顧岐原曰。生死在此一劑。不可不慎。彼謂膿未出無補理。彼排膿內託散。十全大補湯。非外科急劑乎。大抵凡病寧使有餘。後欲剝之。迺爲易易。今狼狽若此。再株守成法剝削。後何以措手。岐原曰。井蛙之見。豈知有天。惟叔命劑。予用黃耆三錢。人參二錢。川芎當歸各一錢。白芷官桂甘草防風各五分。急煎飲之。一帖痛止而精神回。飲食進。再劑而膿潰。十肉帖生。能動止矣。唐迺拊膺嘖嘖。

語同列曰。今而後知補劑能出膿而加食也。吾儕外科當永識此。以爲法則。一婦咳嗽。痰中有紅。大便一日五六度。惡心。飲食極難下膈。纔下膈。腹中卽不安。立時欲瀉。必盡瀉出乃止。肌肉消瘦。下午發熱。熱將發時。四肢先麻。兩足膝皆戰搖。兩寸關脈滑數。兩尺沉細。此虛中有實。積痰飲之候也。脈雖數。午後雖發熱。不敢輕用寒涼。特爲溫補下元。庶關門有守。瀉可止也。山茱萸、兔絲子、人參、破故紙、杜仲、山藥、茯苓、澤瀉、桂心、砂仁。服下甚安。四劑後。下體不戰搖矣。但飲食腹中微疼。卽欲登廁。前方減去山茱萸。加白朮、肉果、木香。八帖愈。

族姪焯。春溫後。忽鼻衄寒戰。小水不利。舌上焦黃。目珠極紅。六脈伏而不見。舉室惶惶。予曰。此作汗之兆。由熱極使然也。因先時汗未透徹。陽明餘熱在經。迫血上行。越出鼻竅。故有此症。以石膏、滑石、生地黃、升麻、赤芍藥、牡丹皮、麥門冬、天花粉、甘草煎而服之。汗出如雨。直至兩踝。舌潤而胎盡退。衄亦止。目珠色淡。脈乃漸出。改用人參、麥門冬、五味子、白芍藥、甘草。知母、黃芩、柴胡、竹葉、石膏。服下大便原五日未通。今亦始行。精神大轉。飲食亦漸進矣。

富陽汪氏婦。對河程門女也。年僅三八。經不行者半載。腹大如斗。堅如石。時或作

痛。里醫盡技以治。月餘弗瘳。乃舉歛友爲翼。又治月餘。腹轉脹急。小水涓滴不通。乃傲予治。孫仲闇法。而用溫補下元之劑。則脹急欲裂。自經求盡。文學南瀛。憐之。薦予診其脈。兩關洪滑鼓指。按之不下。迺有餘之候也。症雖重。機可生。詢其致病之源。由乃姑治家嚴而過儉。其母極事姑息。常令女童袖熟雞牛舌之類私授之。因魃食冷物積而漸成鼓脹。前任事者並不察病源。不審脈候。誤作氣虛中滿治之。脹而欲裂。宜其然也。乃用積塊丸三下之。而脹消積去。後以丹溪保和丸調養一月而愈。積塊丸列赤水玄珠第五卷蟲蠱後

族姪孫仲登。因與堂兄搆訟城中。方歸。時值二月末旬。醉後房事二起。而小溲隨卽臍下作痛。水瀉腸鳴。一日十數度。發熱頭痛。里醫進理中湯一帖。反加嘔逆。煩躁口渴。敦予診之。左脈弦大。右洪大。俱七至。飲食不能下咽。晝夜不得睡。面赤脣燥。舌上黃胎深厚。診畢。語予曰。我房失後。陰症傷寒也。小腹痛。且漏底。幸叔祖救之。予笑而應曰。以子所言。決爲陰症。以子指下辨之。當是春溫陽症也。且外症亦陽。烏得爲有房事而遽以理中進之乎。族中相知者。交爲予言。渠病的屬陰症。故嘔吐水瀉。不可因其面赤。便認爲陽。顧戴陽症。與此近似。幸加察



之。吾輩正擬於理中湯內再加大附子、肉桂、庶可保全。予極言不可。仲景有云。桂枝下咽。陽盛則斃。况附子理中者乎。陰陽寒熱之間。辨之不真。生死反掌耳。茲當舍症而從脈也。以溫膽湯加薑汁炒黃連、柴胡、乾葛與二帖。囑令當夜飲盡。俾明日不它傳也。予別後。渠一服而嘔逆止。餘症悉在。詰朝予診。竟扣渠曰。夜來二藥必未服完。不然何兩手之脈洪大搏指如是。僉曰。因有竹茹、黃連。恐非房尖後所宜。故僅服一。予曰。不服黃連。致熱轉劇。今日非石膏不能已。乃與白虎湯。加竹茹兩劑。臨別囑渠曰。今症非昨日可比。用石膏者。豈得已哉。設當用不用。使經中之熱傳入於腑。非大黃不能瘳。切勿失時誤事。詎知別後又有惑之者。仍只服一帖。瀉卽隨止。餘小腹之痛具在。次日予診畢。語渠曰。昨臨行時。囑之再三。何乃又不服完。今脈洪長堅硬。邪已入腑。奈何奈何。對曰。衆謂石膏太寒。恐小腹加痛。實只服一帖而已。予曰。懼服石膏。今且服大黃矣。皆失時誤事之過。周金人銘云。熒熒不滅。炎炎奈何。其斯之謂歟。思非桃仁承氣湯不可。乃覲面煎服。連飲二劑。下極黑燥糞五六枚。痛熱俱滅。再爲診之。六脈皆緩弱。迨是病方盡去。改以四君子湯。加白芍藥、黃連、香附。調養數日而愈。

汪希明竹山丈長君也。年弱冠。性多躁。素有痰火。舊曾吐紅。張醫用收澀之劑。太早。以致痰與瘀血留滯經絡。釀成病根。恬不知覺。且爲灸肺俞膏盲。撼動前疾。止澀無功。滋陰作壅。咳不能睡。又誤作風邪。而投發散風劑。不思火盛得風。其勢愈熾。血從口鼻噴出。勢如泉湧。延予爲治。六部洪數。身熱而煩。又時當三伏。內外之火夾攻。縱體質剛勁。寧能堪此銷鑠哉。予思非釜底抽薪之法。難奪其上湧之勢。乃以三製大黃三錢。石膏五錢。黃連。茜根。滑石各二錢。牡丹皮一錢。急煎飲之。大便微行二次。血來少緩。卽用石膏。滑石。冬青子各三錢。旱蓮草。茜根各二錢。黃連。山梔子。貝母各一錢。甘草五分。茅草根五錢。煎服。血乃全止。三日後。大便結燥。火又上逆。咳咳連聲。左關脈弦勁。右關洪滑。與當歸龍會丸下之。而咳始緩。改以瓜蒌仁。茜根各一錢。五分。貝母。旱蓮草。麥門冬。知母各一錢。白芍藥二錢。黃連。黃芩各七分。青皮。甘草各三分。仍加茅根。後每遇大便燥結。卽進龍會丸。迹此調理。三月大定。半載全瘳。書云。病有六不灸。火盛者不灸。此由誤灸。幾於不保。故特識之。以爲好灸者龜鑒。

德興文學祝弘吾公。祝令君叔祖也。在休衙偶有陰陽之患。子午潮熱。咳嗽痰多。

汗流不止。胸膈不暢。大便燥結。動作喘乏。口渴。以貝母、知母、瓜蒌仁、桑白皮各一錢。枳殼、黃連、麥門冬各八分。桔梗、柴胡、前胡各五分。甘草三分。五味子十一粒。服下。五更微汗。熱退十之七。惟痰嗽喘乏。改用瓜蒌仁二錢。餘如前。外以七製化痰丸夜服。熱盡退。渠甚喜。以爲自是以往。可勿藥矣。予曰。未也。據脈弦數不減。恐防作瘧。公未爲然。予適東行半月。書報瘧作。咳嗽轉加。所出皆黃粘老痰。予曰。書云。無痰不作瘧。仍用前方。倍加柴胡。貝母爲君。加烏梅一個。四劑霍然。良已。公曰。翁之視疾。應若桴鼓。古云。智者不治已病。治未病。吾於翁言徵之。迺以是備言。祝令公。祝令公喜曰。孫君匪獨得岐黃正脈。其雅誼足稱。叔祖尙未前聞。予當賦詩以贈。於是欣然。手書若干律。以授予。其詩附後

素封汪宥翁。年八十有一。因勞倦感冒。胸膈大熱而痞。口渴。舌上胎白如敷粉。咳嗽夜不能睡。此少陽症也。柴胡一錢。桔梗、枳殼、竹茹、知母各八分。酒連、酒芩、天花粉各七分。甘草四分。薑三片。服下。乃得睡。口仍渴。痰仍嗽。前方加半夏。夜與二母丸。治其熱嗽而愈。

汪鍊兄內人。經水久不止。內有紫黑血塊。今則胃脘胸腹皆痛。玉戶且腫。手足皆

冷。絕不知餓。臍腹之下有一塊。堅如鐵。脈左數右沉澹。此血痕症也。用糖毬子五錢。玄胡索、五靈脂、香附、麥芽、青皮各一錢。水煎服。夜卽痛減其半。手足漸溫。後加丹參、川芎、蒲黃、益母草、當歸。四帖而痛全止。玉戶亦消。再四帖而經調。程相如丈令政。孕四月。頭疼。遍身皆痛。腰痛更甚。惡寒發熱。咳嗽口渴。六脈浮數。以小柴胡湯加防風、羌活、葛根、薑棗煎服。夜忽大發寒戰。繼而發熱。五更又發戰。告急於予。予曰。此作汗之兆。俄而汗出口渴。頭疼身熱皆減。惟胸膈脹悶。此胎氣上逼而爲子懸。以大紫蘇飲與之。紫蘇、人參、白朮、茯苓、甘草、當歸、陳皮、大腹皮、川芎、白芍藥。服後身冷而汗出不止。胸腹脹痛急。以奪命丹進。服下嗒然而睡。覺則痛止脹消。始能進食。身溫汗止。駸駸向安。奪命丹用白茯苓、牡丹皮、桃仁、白芍藥、桂枝。醋水煎服。止痛如神。

余文台壯年咳嗽吐紅。腹中常痛。夜多口渴。夢遺。背心作脹。兩手脈短弱。兩鬲弦大。左尺弱。右尺滑大。心血不足。中焦有痰積。膈間有瘀血。陰分有溼火。乃先爲清肅上焦。用山梔仁、牡丹皮、丹參、茯苓、甘草、貝母、橘紅、益元散。服十帖。背脹漸消。惟咳不止。改用黃芩、杏仁、半夏、麩、益元散、黃連、瓜蒌仁、甘草。十帖而嗽止。惟

腹疼不除。再以遇仙丹。同丹溪保和丸進之。大便下稠積痰甚多。後以人參、白茯苓、白芍藥、紫苑、知母、麥門冬、甘草、當歸、五味子調理而愈。

邵伯成丈大令愛。經水適行。洗浴後感冒風邪。誤服人參補劑。大發寒熱。嘔吐煩躁。隨即口噤心煩不安。循衣摸床。時當仲夏之晦。予謂上焦有痰。因誤補。故阻滯其氣道而然。與加味溫膽湯。半夏四錢。橘紅二錢。白茯苓、枳實、竹茹、麥門冬各一錢。益元散三錢。生薑三片。水煎飲之一帖而安。後稍勞。復頭疼。痰火上衝。背脹腰痛。以柴胡、薄荷、甘草、枳殼、桔梗、酒芩、桑皮、半夏、麥門冬、山梔仁、茯苓、生薑調養全愈。

金氏婦。蘇雙泉之親媽也。舊秋患崩中愈後。方百日。時值上巳。因洗浴受風邪。外寒而束內熱。前後心脹。四肢腫痛。面有浮氣。惡寒發熱。呵欠不時。大小便欲行不行。口內常甜。六脈浮大而數。以柴胡、紫蘇、麻黃、桔梗、枳殼、大腹皮、厚朴、酒芩、薑黃服下。夜得微汗。胸腹稍安。四肢仍脹。再加蘿蔔子進之。覺煩躁。且醋心。改用二陳湯。加香附、大腹皮、桑白皮、薑連、枳殼、山梔子各八分。益元散二錢。薏苡仁三錢。吳茱萸三分。服下。四肢消半。面氣全消。覺腰痛暖氣胸膈嘈辣。用六君

子湯。加薏苡仁、薑連、厚朴、知母、澤瀉、鬱金、砂仁、枳實。調養半月。四肢悉平。嘈雜尋愈。

文學張雲門三令郎丁年。偶發寒熱。右脇有一塊。降起疼痛。手不可近。下午至夜尤甚。額顱手心皆熱。脈右關洪滑。兩尺尤有力。日夜不得睡。迺做推氣散。例用薑黃、桔梗、川芎各一錢五分。枳實二錢。白芍藥一錢。粉甘草五分。薑棗煎服。外與當歸龍會丸。其夜大便秘行一次。頗得睡。三更後。先發寒戰。徐熱。至五鼓微汗。而脇疼寒熱悉減。再診之。左脈略弦。舌有黃白厚胎。兩脇重按微疼。大便秘結不行。以小柴胡湯減半夏。倍加瓜蒌、鱉甲、牡蠣。脇疼全瘳。畢九略硬痛。彼自以爲無恙矣。予語渠姐夫徐仲子。偉曰。病先起脇下。顧脇下爲肝之經。後及畢九硬疼。其畢九亦肝之地。此餘熱未盡徹故也。而彼已厭藥。以小愈爲全安。不出浹旬。必有奇疾。徐仲子曰。奇者若何。余曰。此君性急好勝。倘勉強作文。遇勞而發。增寒壯熱。非瘧卽囊癰也。予尙東行。子宜識之。別後半月。果因作文。夜發寒熱。囊漸腫大。其熱如火。及予至診之。六部皆數。兩尺且近於洪。知其膿已成。必潰而後已。彼心甚恐。予曰。無傷。易與耳。急以營衛返魂湯。加金銀花爲君。兩帖

而膿潰。再加人參。又兩帖而肌生。十日全愈。方用何首烏、赤芍藥、當歸、小茴香、甘草節、木通、金銀花、貝母、枳殼、白芷。水與酒共煎服之。此方加獨活。治流注尤神。

朱宅內眷。孕已八月。因送殯受驚。胸膈脹悶。嘔逆不入食。城中時師認爲外感。爲之發散。嘔惡愈劇。舉家恐胎有動。延予診視。兩寸脈皆洪滑。兩尺弱。此亢上不下之候。胸膈脹者。蓋由于懸而然。此一劑可瘳也。夫曰胎婦難任。峻劑觀其嘔惡之狀。脹悶之勢。時刻不祇一劑。曷愈。予曰。請試之。與溫膽湯。加薑汁炒黃連。大腹皮。煎成。送下薑汁益元丸。果一帖而嘔止。膈寬。卽能進食。午後酣寢。怡然。若未始有病者。其夫訝曰。溫膽湯何神若此。幸詳其義。予曰。胎孕之症。重在足少陽。足少陽者。膽也。病起於驚。氣逆。痰隨胎氣上逼。故脈亢上不下。在難經爲溢候。由木火之性上而不下。經曰。上部有脈。下部無脈。其人當吐。不吐者死。予故用一劑可愈也。方名溫膽者。此溫字非溫暖之溫。迺溫存之溫。黃連、竹茹。清其肝膽之火。同白茯苓而安心神。益元丸壓其痰火下行。火下行而胎因之亦安矣。筠臯公曰。先生認症真。故投劑確。非神乎。藥神乎。用也。

胡隣泉令愛及笄。後患吐血。每吐碗餘。下午倦怠。夜夜潮熱嘔吐不食。大便秘結。時師視爲陰虛火動。投以滋陰之劑。反加飽悶。背心脹痛。予診其脈。兩寸洪大。兩尺弱。知其有瘀血凝滯。以致新血不得歸經。故滿而溢也。法當消瘀爲主。用白芍藥、枳殼、前胡、益元散、桃仁、紅花、牡丹皮、山梔子、貝母、水煎。臨服入蘿蔔汁一小酒杯。服後嘔吐如舊。大便仍秘。乃以龍會丸通之。更以石膏三錢、橘紅、半夏、夏麩、薑連、茜根、竹茹、黃連、枳殼各一錢、白茯苓八分、甘草三分。服後大便秘行三次。吐止食進。後用二陳湯加滑石、丹參、丹皮、茜根、白芍藥、香附。二十劑後經行熱退。背脹悉愈。從此經調血不上逆。

汪思石令堂。年可五旬。大怒後小解。驀然暈厥。口禁牙關。不省人事。以蘇合香丸灌之而甦。左手右足疼痛不能舉動。用二陳湯加酒芩、五加皮、秦艽、石菖蒲、防風、薏苡仁、紫荊皮。四帖而愈。

族姪孫君寶。壯年患遍身筋骨疼痛。肢節腫痛。其痛極狀如虎嚙。大小便起止。非三五人不能扶。諸痛處熱如火燎。食飲不入。呻吟床褥。已經二候。有以疎風之劑投者。不應。又以乳香沒藥活血止痛之劑投者。亦不應。延予診治。六脈浮緊。



而數。予曰。此周痺也。勢甚惡。俗名白虎。歷節風。迺濕熱所致。丹溪云。腫屬濕。痛屬火。火性速。故痛暴猛。若此。以生地黃、紅花、酒芩、酒連、酒柏、秦艽、防風、羌活、獨活、海桐皮、葳靈仙、甘草、四劑而痛減大半。再加赤芍藥、當歸、蒼耳子、薏苡仁。減去獨活、秦艽。又八劑全愈。

葉子黑。內人患疫。醫爲其汗。爲其下。擊技不能起。屍寢者已浹旬。家事窶乏。亦不能復聊醫。鄰人覩其狀。以生死在須臾間。羣然發善愿。科斂助其殯。斂之需。予聞爲之診。六部俱微弱。不充指。右關稍滑。精神昏憊。僅一息奄奄。四肢冷厥。口渴。予診畢。語諸鄰曰。據症甚危。據脈邪已盡退。惟虛憊而神氣弱。非大補不能也。諸君苟能以助殯者。助其市人參。庶幾可起。死而還之生也。諸君旣憐其死。寧不以冀其生乎。予非毫有希覬。顧渠力不足贍。願與諸君共圓滿。好生善果耳。諸鄰固有善心。激於余言。益忻然相語曰。惟先生命。卽以六君子湯加歸芍。補氣血而化痰涎。以麥門冬、五味子。復脈通心而生津液。以桂枝溫其四體。午刻進藥。晡刻四肢漸暖。精神煥發。尙無力開聲。改以生脈湯。加遠志、歸芍、苡仁。山藥。調理而愈。諸鄰人大快。

孫如亭令政。年過四十。眼偶赤腫。兩太陽疼痛。大便不行者三日。平時汛期一月。僅二日。今行四日。猶且未止。里有開化余雲谷者。自謂眼科捷手。醫治踰候。腫赤不消。而右眼內眦突生一白泡。垂與鼻齊。大二寸餘。余見而駭走。以爲奇疾。莫能措劑。又見其嘔吐眩暈。伏於枕上。略不敢動。稍動則眩愈極。吐愈急。疑其變而不治。予爲診之。兩寸關脈俱滑。大有力。兩尺沉微。予曰。此中焦有痰。肝膽有火。必爲怒氣所觸。而然。內經云。諸風掉眩。皆屬肝木。諸逆衝上。皆屬於火。蓋無痰不作暈也。眼眦白泡。迺火性急速。怒氣加之。氣乘於絡。上而不下。故直脹出眼外也。古壯士一怒而目眦裂。與白泡脹出眦外理同。肝爲血海。故血亦來不止。治當抑其肝木。清鎮痰火。則諸症自瘳。先用薑汁益元丸。壓其痰火。以止其吐。再以二陳湯。加酒連、酒芩、天麻、滑石、吳茱萸、竹茹、枳實。煎飲一帖。吐止。暈定。頭稍能動。改用二陳湯。加芩、連、穀精草、香附、夏枯草、茱萸、薏苡仁。兩劑赤腫消。白泡斂。四劑全愈。血海亦淨。從是後不發。

吳勉齋年近五十。有腹痛疾。或作或止。性極急。多躁多怒。今痛在當臍。不間晝夜。市里醫者爲下之。已五日。大便雖瀉。痛則尤甚。飲食不進。手足清冷。形神俱倦。

脈僅四至。重按則伏而有力。此由攻尅太過。寒涼傷脾。脾虛則中氣不運。積反凝滯。以故大便雖瀉。而積不行。痛終不減也。治當建立中氣爲主。中氣一同。痛當立止。先與王海藏五神丸三錢。滾水送下。以止其痛。此丸補接元氣。安和五臟。升降陰陽。極有神應。故名五神丸。方出醫壘元戎第十卷中再用小建中湯。調肝養脾。蓋臍下迺肝經部位。惟此湯迺對症劑也。白芍酒炒三錢。炙甘草一錢五分。桂心一錢。加香附一錢。生薑三片。水煎服。午牌進藥。未牌已報痛止。因其夜進粥太頻。且食鴨汁。撼動餘積。腹又作痛。且加脹悶。面有浮氣。裏急後重。與四平丸而漸定。外以二陳湯加香附、砂仁、蒼朮、厚朴、山查。腹中始覺寬快。三日無恙。又縱恣口腹。大啖肥甘糕粽肉鷄之類。不飽不止。腹中大痛。時刻難存。欲吐則食已下。膈欲瀉。則食尙未入腸。自喊叫云。可取木香檳榔丸。大承氣湯。急與我下之。雖死無憾。予諭之曰。據痛雖甚。腹則不堅。顧今日適屆冬節。禮曰。先王於至日。閉關安靜。以養微陽。曷敢以大寒峻劑而汨天和乎。設不得已。只須柏樹東行。根上白皮一錢。長流水煎飲之。一服可愈也。夜已二鼓。覓而煎服。天明瀉三五行。痛減大半。仍與小建中湯和之。痛又旋減。惟臍下尙不脫然。常常以熱手重

熨之。大便欲行。及至廁。則又不解。知其血少而氣不調。用熟地三錢。白芍一錢。杏仁二錢。烏藥一錢。木香五分。水煎飲。既下黑糞甚多。十年腹痛沉疴。從此再不復萌。此後勉齋常語人曰。吾得孫公五神丸。柏根皮。小建中湯三法。不啻脫胎換骨。數年來。豈惟飲食增加。卽步履輕便。捷若少壯。皆孫君賜也。親友有求其三法者。昇而服之。捷若桴鼓。彼家謂殆予三生夙緣云。

黃熙齋內子新產。醉犯房事。血來如崩。勢不可遏。發熱頭暈。大小便俱熱。六脈洪大。以竹茹。蒲黃。白芍各一錢。香附。茯苓。側柏葉。青蒿各七分。甘草。炮薑。艾葉各三分。血止大半。腰猶脹痛。下午胸膈飽悶。改以川芎五分。當歸。茯苓。破故紙。蒲黃。香附各八分。薑炭。甘草各一分。陳皮七分。人參一錢。服此血全止。腰痛亦愈。程心草兄。頰腮紅腫。嘔惡發熱。不能進食。下午煩躁口苦。夜不能睡。六脈洪大。此俗名鷓鴣瘟是也。迺少陽陽明二經之症。法當清解。以柴胡。貫衆各二錢。乾葛。竹茹。半夏。麩各一錢。黃連。枳殼各七分。甘草四分。一帖而瘳其半。再服。腫消食進而安睡矣。

程六十者。原有喘嗽。今腫發於面。四肢俱浮。大便溏。小水少。時多怔忡。此痰飲症。

也。以旋覆花湯。加桑白皮、薏苡仁主之。旋覆花、桑白皮各一錢。半夏、人參、橘紅、茯苓各七分。厚朴五分。桂心、甘草各二分。薏苡仁一錢五分。生薑三片。水煎服。一劑而怔忡除。四劑喘腫俱消。

程七護丈發熱背痛。起於傷酒。醫治三月。反加裏急後重。瀉下紅白稠粘。中脘有塊。自鳩尾骨直硬至臍。如橫梁狀。小水少且澀。一日僅進粥二盞。臥不能起。纔立起。卽後重下墜。腹中隱隱痛。與積塊丸消之。連與二日。所下血屑甚多。外與滑石三錢。當歸二錢。桃仁、川芎、白芍藥、枳實、山查各一錢。酒芩、酒連各八分。木香六分。升麻五分。連進四帖。塊軟腹寬。再以丹溪保和丸兼服一月。而消其六。飲食大加。紅白俱無。塊痛硬勢雖云稍可。然其根尙未易刈。素多縱性。飲啖無忌。每每爲飲食所復。病久而中氣虛弱。難任峻劑。迺與六君子湯。加香附、山查、滑石、紅麴、木香、酒連。調理而全。迺囑之曰。足下兩構危疾。皆縱恣所致。不佞殫力盡技。爲足下拯之。非易易也。固三生之緣。有在。幸無爲再誤。邵子謂爽口物作疾。快心事爲殃。足下其鑒諸。

程孺人黃氏。予之內親也。發熱頭痛。遍身如燬。口渴譫語。飲食不進。先已迎程文

峰氏療之。認爲痛風症。授以蠟丸。及辛溫之劑。進之。予適至。爲之診。六部弦而洪數。視其舌皆沉香焦燥。芒刺深厚。神漸昏沉。迺語之曰。此春溫過時熱病也。法宜清解。彼視爲痛風。而用辛溫。是謂如火益熱。適足以戕生。非衛生也。方和宇氏亦以予言爲是。迺用石膏五錢。知母、麥冬各三錢。竹茹、甘草、黃連各一錢。生薑三片。一帖而神清。再帖汗津津出。始能言。熱解食進。又兩帖。一身輕快。自能坐立。再用薏苡仁、麥門冬、白扁豆、甘草、黃連、白芍藥、香薷、白茯苓。調養而愈。程有望孺人。年踰五十。月汛當止不止。來且甚多。遍身皆疼。手足牽扯而痛。牙疼。經年不愈。此氣虛血熱症也。白芍藥二錢。當歸八分。人參七分。蒲黃、五靈脂、炒黑側柏葉各一錢五分。甘草、薑炭各三分。四帖。諸症悉減。惟牙痛尙存。改用石膏一錢五分。人參、石斛、當歸各八分。地黃、白芍藥各一錢。黃連、升麻各七分。白芷、甘草各三分。再四帖。牙疼亦愈。

上舍近洲。予族中至厚姪孫也。性拓落豪放不羈。夏仲在茗。與諸友泛舟遊於碧浪之間。興至卽百觥不辭。亦以是終爲酒困也。嘔惡體熱。胸脇脹悶。腹中疼痛。大便秘結。飲食大減。茗之名醫如楊調元者。橋梓悉方治之。已三月。或愈或否。

延至深秋。肌瘦神瘁。日進米僅二合。胸脇脹。腹中痛。漠然略無所減。慙然而不可支。兩足皆有浮氣。歸謀於予。左脈沉弦而數。右關結實。大如碧豆。因詰其在。茗所服之劑。答曰。彼謂姪孫稟薄。肌脆。宜當理脾。向服多理脾之劑。予曰。否。子所苦者。胸脇脹悶。腹中疼痛。大便燥結。其累大矣。理脾曷可以去此哉。適足以益病耳。經曰。塞者通之。又曰。通則不痛。其治此病之謂歟。迺取當歸龍會丸。三下之。大便行五六度。又與酒連。酒芩。青蒿。薑黃。檳榔。青皮。半夏。葛根。飲之。豁然焦膈通達。呼吸開利。惟頭略暈。足上浮未去。前方再加滑石。茯苓。薏苡仁。山查。與調中丸兼服。半月全愈。近洲喜曰。人皆謂我症似中滿。今不滿者。叔公力也。敢不德歟。予警之曰。吾聞君子之於身也。兢兢焉。不敢輕父母之遺體。無伐天和。則疾疢不作。無反天常。則裁害不逢。蘧伯玉嘗言。行年五十。而知四十九年之非。况新愈後。尤當痛懲。庶保遐齡。區區無足恃也。別未五年。予在宜興。聞訃。果以傷酒而卒。噫。惜哉。

甲午仲秋下旬。黃源金先生以中饋病急。謁予於市。貌甚慘。步立慄然。語其症。怔怔言澁於吻。不勝其憂。執族醫尺一白予云。病自仲夏吐血二碗餘。初以芩連。

梔、柏、生地、芍藥、大寒之劑投之。一帖而止。未幾則咳嗽徹晝夜。後師謂咳自吐血後。當從滋陰降火之治。逾兩月。盡其法而罔效。反加喘促洩瀉。辰巳二時發熱煩躁。師告技窮。謂喘咳迺火刑肺金。洩瀉迺脾胃已僮。保脾則火愈熾而喘咳增。加滋陰則洩瀉綿綿而元氣下脫。經書所記嗽而下洩上喘者死。此症之謂也。似無可奈何矣。語竟。淚潛潛下。予觀其忡忡之狀。心不覺惕然動也。市去渠宅五里許。即步去一視。觀其面青。喘從擡肩擷項。息息連身而倒。脇背俱疼。日夜不得伏枕。脈之左澁。右寸關滑大。診畢。顧金兄猶淚盈眦。予撫其背曰。毋淚。尚可生也。適徐仲子同視。詰予曰。症若此。夫子曰可生何也。予曰。是非汝所知也。第觀予治。俟奏功。當語汝。遂以紫苑、茜根、牡丹皮、桃仁、益元散、桑白皮、茯苓、桔梗、瓜蒌仁、桂枝、白前水煎。臨服加薑棗汁半酒杯。服後背脇痛止。瀉減半。迺得睡。但咳而聲啞不除。次以杏仁、桔梗、紫苑、甘草、白前五味子、瓜蒌、乾薑、款冬花、半夏、通草水煎服。服後聲漸開。瀉全止。惟嗽尚多。再以半夏、通草、桔梗、茯苓、陳皮、甘草、杏仁、桑白皮、白前、苡仁、白芍、牡丹皮水煎。後以丹溪治嗽吐方。用瀉白散加青皮、人參、白茯苓、五味子。調理全愈。次年誕一子。是役也。徐仲子之



功居多。蓋金爲徐仲子友也。徐仲子治疾多奇中。迺篤信予而推轂之。初投劑。人多置議。仲子獨贊之曰。其必有見也。人人辟易。彼許可生。安得不望生哉。故金任之不貳。功成。余明甫查仲修問予曰。病起於吐紅發熱。煩躁喘咳。皆是火邪。前後之師。滋陰降火藥。法亦未爽。然而病轉增劇。其故何也。予答曰。醫不難於用藥。而難於認病。余明甫查仲修曰。市人議先生治疾多不循方。每每師心。金之役人。皆市爲火症。而用寒涼。先生獨用溫熱。雖成功。小子竊爲先生恐。予曰。病原於火。其勢之劇。以治之太峻致然。夫血之初來。勢如湧泉。安能一吐遂盡。必有餘血伏於經絡。思不及此。而以大寒之劑。一帖而止。夫大寒之劑。豈能止血。適以凝其血耳。血凝經絡。滯於氣道。氣滯血凝。日甚一日。氣滯又復生痰。痰與瘀血兩滯經絡。則肺氣不利。故咳嗽聲啞。不加察而爲消痰化痰。導血歸經。又以滋陰苦寒之劑施之。則痰瘀愈凝。而氣道愈不利也。久則胃寒脾弱。反增洩瀉。晝夜喘促。不能臥矣。書云。上熱未除。中寒復生。而爲陰盛格陽之症。故咳而嘔吐。予故始以桂枝乾薑之類溫其胃。以桃仁葶汁丹皮茜根之類治其血。而消其瘀。故喘止而瀉除。東垣曰。脾胃喜溫而惡寒。信不欺也。古謂藥不貴

執方而貴合宜。方卽兵家之陣圖。匠氏之規矩也。圖可授人。而不能授人鬪。匠可授人規矩。而不能授人巧。此岳武穆對宗留守云。運用之妙。存乎一心也。予遊方之外。亦不失方之內。惟不失方。竊謂知方。知方合法。豈區區能哉。觀古人治虛怯之疾。卽不治之症。亦能延之三五載。迺今治虛怯者。不生載而竟殞逝。猶駕言曰。殆今之天元運氣使然。故人多不壽。愚謂天元運氣。則人人皆如是夫。何予母八十有六。予父踰八望九。予伯母今九十有五。予表伯汪春元。東台之父。年九十餘。強健不啻少壯。不思速夭之由。皆爲滋陰降火之誤。而反歸咎於天。天何尤哉。緣滋陰降火之法。起於丹溪。繼而王節齋。何大英之流。倡而和之。以成其風。此當今之大弊。而人未之警也。我師祖汪石山先生。揭而指之。惜乎未有繼其言者。一齊衆楚。故滋陰之禍流而迨今。敝以繼敝。無已時也。二子其識之。徐仲子其聞之乎。仲修又問先生何以認是症爲中寒。而非陰虛之火。而又認其喘爲瘀血也。予曰。脈與症皆可考。脈經云。澁爲氣滯。氣滯則血凝。盛吐之後。大寒之藥一帖而止。其未盡之餘血。爲寒涼所凝滯於氣道。爲喘。書云。從前來者爲本。從後來者爲標。茲用活血消瘀之劑。治其本。以溫熱暖胃之

劑治其標。故瀉止而喘定也。若夫陰虛火動之脈。迺細數之候。今脈滑大。非陰虛之脈。陰虛喘嗽之症。潮熱於夜。兩頰皆紅。今熱在辰巳陽分。而面色帶青。由是以知其非陰虛之火。乃誤用寒涼。激其火而上行也。經曰。水流濕。火就燥。中氣既寒。火愈不能下矣。正如雨驟雷烈。則電光之火愈熾。日出而電光自息也。且陰虛火動。火起九泉。皆自足下湧泉穴起。以漸上升。今膝下冷而上身熱。兩尺脈又弱。蓋由咳而氣升。經曰。形寒飲冷則傷肺。肺氣爲寒。藥壅遏不得下降。故咳而吐酸。丹溪纂要云。陰氣在下。陽氣在上。喘咳嘔吐瀉白散。加入人參、茯苓、五味子、青皮。故不從河間。而用諸嘔吐酸皆屬於火之治。况今歲次甲午爲濕土司運。八月建酉。水土衰敗之時。內經曰。毋違時。毋伐化。且脾惡濕。濕多則瀉。濕則生痰。前後之師。不考運氣月令。一概而用滋陰降火之劑。助濕生痰。安望其痰之愈也。丹溪纂要云。實脾土。燥脾濕。是治痰之本也。遵而用之。如鼓應桴。予故曰。醫不難於用藥。而難於認病。有以也。

族姪合溪。年當八旬。春初偶爲寒襲。發熱咳嗽。醫與芎蘇散。卽汗出不止。飽飽連聲。勻粒不入。昏憤經旬。汗日加。飽日甚。延予診之。六部浮大無力。重按三五不

調六七至一止。右關近滑。診畢。語嗣君敬所曰。尊翁由勞倦表虛感邪。脈故浮大無力。法當從東垣補中益氣湯。一二劑可瘳也。醫乃妄爲散表。致汗漏神疲。昏憤飽餒。高年值此。寧不殆乎。即可徼倖圖安。亦不過千日養耳。敬所勃然俛而對曰。上已後爲家君壽期。不虞搆疾。羸僊若此。苟保百日。俾菽水之心。庶幾少盡。叔祖之賜多矣。若千日。又出於望外也。予卽以六君子湯。加竹茹。柿蒂。以止餒。再加酸棗仁。石斛。以斂汗。一進熱退。餒定。再進汗止。食入。三進。濡濡然精神長矣。乃減去竹茹。柿蒂。加當歸。半月全安。先是祝令君謂渠有嗜德。請爲介賓。以疾辭不及赴。迨季春。令君聞渠壽。卽援例賜一級寵。以冠帶扁額。用彰恩典。光於鄉間。後果三年而卒。

孝廉方叔度。令嫂江氏。年甫三旬。患脹滿。諸名家或補或消。或分利。或溫或寒。悉爲整理一番。束手而去。舉家惶惶無所適。從叔度曰。聞孫仲闇昔患此。衆亦束手。比得孫生生者治而起之。衆皆斂衽斂服。仲闇伯仲適在館中。闔諮訪之。卽發書介予。隨紹嚮往。診得左脈絃大。右滑大。予曰。此李東垣木香化滯湯症也。病從憂思而起。合如法按治。可保終吉。叔度喜曰。曩從事諸公。悉云不治。先生

謂可保終吉。此故倉公有言。拙者疑殆。良工取焉是也。幸先生早爲措劑。予卽照本方發四帖。服訖。腹果寬其半。繼以人參消痞湯。琥珀調中丸。調理二月全瘳。叔度信予從此始。每推轂予於諸相知。多有奇中。卒爲通家之好。

臨溪吳天威丈。年七十有三。容邸遠歸。偶墜馬跌傷。左脇作痛。隨治而愈。後半年。忽左胯腫痛。增寒作熱。動止極艱。里中諸公有認濕痰者。有認濕熱者。總罔效。聞歙外科洪氏能。且識雜病。迂以爲治。居數日。視爲疝氣。率投荔枝核。大小茴香。川練子。橘核之類。痛躁不可當。乃欲引繩自絕。諸子百般慰解。洪乃辭去。竟不知爲何疾也。其壻汪開之。予之表弟也。邀予診之。六脈而浮而洪。數。左寸尤甚。驗其痛處。紅腫光浮如匏。撫之烙手。予曰。此便癰也。洪係外科專門。胡獨忽此。蓋渠素慎重。見患者年高。烏敢認爲便癰治哉。此殆千慮一失。毋足怪。諸郎君聞予言。皆駭然。詰予曰。家嚴不御色者十載。顧安得此。願先生再思。予曰。此非近色而得。審髀屬足厥陰肝經。肝爲血海。乃昔時墜馬惡血消之未盡。瘀蓄經絡。無門可出。化而爲膿。由年高氣虛。又被香燥尅伐太過。不能潰而卽出。故散漫浮腫。觀其色青中隱黑。膿已成腐。必須外用鑱針。引而出之。

內用千金託裏。庶可排膿生肉。但予生平心慈。不能用針。予弟警吾。外科良手。可延而決之。至卽以錢鍼深入寸餘。出青黑膿五六椀許。臭穢難近。卽語諸郎君曰。使早決三日。可免一月之苦。今卽日大補之。非百日不能痊。此俗名石米瘡也。諸郎君及患者見膿色如是。始信予言不爽。急以請劑。予乃用內託十宣散。參耆每帖三錢。後加至五錢。一日兩進。兩越月膿盡肉滿而愈。一市稱奇。

文貴者。善爲族文學。岐原出入子母者也。寓長興邸中。病發熱晝夜不止。口渴齒燥鼻乾。舌胎黃厚。不得眠。服藥不效。予適至雒城。岐原邀診之。脈俱洪數。嘔惡胸膈痞懣。小水短而赤。大便下皆清水。予以石膏七錢。知母五錢。甘草一錢。軟柴胡五錢。葛根三錢。黃芩二錢。枳殼。桔梗。竹茹各一錢。連進三帖。嘔惡止。胸膈寬。熱仍未退。無汗瀉未止也。時有問予者。謂胡不用柴苓湯。而退熱止瀉也。服石膏故益瀉耳。予戲之曰。予乃二脚描耶。能認此爲何症。而用柴胡湯也。仍以柴胡。石膏各七錢爲君。葛根。知母各五錢爲臣。黃芩。甘草各一錢爲佐。生薑五片。速進二帖。汗則津津然出。熱退瀉止。口不渴而眠矣。予因他往。留藥三劑。而囑之曰。胃氣初回。勢必思食。宜謹慎不可多進。若多則餘熱復作。必成食復。治

將費手也。慎之慎之。後五日。果以食不慎而復病。予又至。熱較前爲重。且加懊  
懷。夜譫語如見鬼狀。口大渴。齒燥。舌焦黑。有芒刺。熱危甚急。以前方加枳實。梔  
子各三錢。淡豆豉二錢。煎飲之。二帖。懊懷止。餘症猶然。夜更甚。前方減去豆豉。  
加黃連。麥冬。生地。白芍。一日二帖。舌以井水生薑擦去黑胎。用蜜調玄明粉塗  
之。而胎去矣。服三日。始得微汗。諸症盡減。再四叮嚀。慎飲食。調理半月而全。岐  
原問曰。人始皆認此症爲漏底傷寒。謂叔不用柴芩湯退熱止瀉。而用石膏爲  
非。乃竟以石膏收功何也。予曰。此問甚善。蓋醫貴認症。此症乃少陽陽明合病  
也。柴胡白虎湯。葛根爲二經對症之藥。服之可解肌熱。止口渴。若柴芩湯爲太  
陽少陽合病之劑。內有五苓散。乃太陽經之裏藥。症非太陽。曷敢用之。且其內  
有人參。白朮。肉桂。皆助熱發燥之味。誤投則必發斑。其齒燥舌乾而焦黑。又何  
敢用茯苓。澤瀉。豬苓利之。使益亡其津液耶。古人謂以傷寒爲大病。不察症而  
誤投。則生死立見。傷寒論有言。不得汗。不得下。不得利。小便。是謂三禁。故曰。少  
陽陽明。不從標本。從乎中治。小柴胡白虎湯中治劑也。人徒見其大便作瀉。爲  
漏底。不察瀉皆清水無糟粕者。爲熱極所致。症乃春溫時疫也。但爲發散。使清

氣上升。而微有汗。瀉當自止。此瀉豈五苓散所能止哉。止則誤事。岐原曰。夜重如見鬼者。何以故。予曰。熱入血室故也。岐原曰。男子亦有血室乎。予曰。血室男婦同之。衝任二脈。爲血之海。二脈附於陽明。今病乃陽明之熱。遺入血海也。故加生地。白芍而效。余治傷寒。用柴葛解肌湯。及柴胡白虎湯。而熱不解者。加此二味。則熱無不退。汗無不出矣。且下午與夜。又陰分主事。欲解血海之熱。必投此二味。以收其功。此亦予一得之愚也。岐原曰。善願記之。以詔後來。

鍾澤有程夢奎孺人者。年將五十。僅一子。念一歲。而歿於痘。旦夕哭之。哀且彌月。攬鏡自鑑曰。何子死而形色不瘁如此。因持鐵如意。鏗其胸。絕粒斷漿。肌容日痿。時爲初秋。寒熱交作。嘔噦懊懣。遍身疼。夫爲遍延診視。却藥不飲。諸醫百策。開譬拒而不聽。媳與孫跽而懇。姻族就而論。其不納者。若罔聞也。惟合睫以待死。已而作色語其夫曰。病若此。汝曷不延名醫一決生死乎。夫曰。所延皆名士。病者曰。昔常聞程方塘參軍患瘋三年而起者誰。曰。孫君。又問吳西源孺人病燥渴痰喘三年。與程道吾內眷勞瘵暈厥。誰爲起之。夫答如前。病者曰。何不請孫君決我生死。夫聞言。物色徵予。五日而後至。則薄暮矣。病者猶疑爲誕也。私



至三家訪予狀。皆曰：魁然長髯者也。詰朝，覲面診之畢，則問曰：何日死？予應曰：病勢危，去死不遠。病者喟然嘆曰：死不足惜，第九華山香愿未了，爲恨耳。予曰：孺人大愿不思，何須以此小愿爲孜孜也？孺人曰：無大愿。予曰：人之脩短有數，今年之痘死者不可勝計，令嗣之死亦數也。然有二孫可承宗祧，孺人能忍哀撫孫，使其成立娶婦，以審後胤，令嗣雖死猶不死也。而孺人亦有令名，若不此之思，憂傷以殞，夫君必娶，娶必少年，繼室生子，則必厚其子，而薄孺人之孫，晚娘晚爺之謠，獨不聞之耶？孺人萬金之家，使令孫不得其所，令嗣九泉之下，恐不能無憾。孺人憂死，何益也？愿孰大於此者？予故謂未之思耳。孺人試思之，誰輕誰重，當自辨也。語畢，憮然曰：先生言至此，吾如寐者得醒矣。顧病勢去死不遠，何能得如吾愿？予曰：所謂近者病也，非脈也。脈左弦細，右關滑，故發熱體痛嘔噦，乃秋來癰症，非死脈也。若如前執拗不服藥，不進飲食，書謂絕穀者亡，殆非虛語。孺人誠聽余言，以二孫爲念，以大體爲重，予以活血養血之劑，而治其傷損，以小柴胡加竹茹、滑石，以和陰陽而止其嘔噦，不一月而可無恙矣。奚憂哉？果從予言而進食服藥，調理五日，寒熱嘔噦皆止。後以丹參、劉寄奴各三錢。

爲臣。五加皮五錢爲君。香附一錢爲佐。入四物煎服。果一月而全可矣。程孺人病起。而聞者皆曰。七發起太子之病。觀於孫君益信。

歎潛口汪召南令郎。年十四。患蟲脹大如覆箕。經醫三十餘人。見症皆駭而走。獨市之幼科汪養直者。調理數數見效。第此子溺於豢養。縱口腹。不守戒忌。病多反復。一日語召南曰。郎君之症。非求之孫生生者。不能成功。召南曰。聞此公多游吳浙縉紳間。何可以月日致也。養直曰。歸矣。吾有妹適羅田。爲方與石某嫂也。舊歲患症如蟲。治經彌歲無功。生生子立全之。吾推轂孫君者。豈有他腸。爲郎君也。召南卽浼羅田延予。予至日已晡矣。觀病者腹脹大極。青筋縷縷如蚯蚓大。上自胸脯。至上腕而止。惟喜其不下現也。臍平。四肢面目皆浮大。兩足臍骨上各裂開。大出清水。一日間數爲更衣。被陰囊光腫如泡。淫淫滲濕。發寒熱。脈以手腫不能取。必推開其腫。下指重按。浮而六至。予曰。症可謂重之極矣。僅可恃者。目瞳子有神耳。餘皆險惡。將何以治。養直知予至。亟過相陪。宣言曰。病重不必言。引領先生久矣。幸爲投劑。生死無憾。予曰。且先爲理表。若表微稍得微汗。使肺氣少利。則小水可通。召南喜而亟請藥。乃用紫蘇葉。蘇子。陳皮。麻

黃各一錢。桑白皮八分。防風、杏仁各七分。炙甘草、桂枝各二分。生薑三片。水煎服之。五更乃有微汗。次早面上氣稍消。胸脯青筋皆退。餘症雖仍舊。機栝則可生矣。仍投前藥。次日腹與四肢皆有皺紋。惟小水未利。乃改用破故紙、蒼朮、赤茯苓、澤瀉、桑白皮、赤小豆、桂心、木香二帖。而小水利。駸駸已有生意。乃以飲食過度。大便作瀉。又以四君子湯加苡仁、破故紙、澤瀉、山查、砂仁調理。而全安。此症予閱歷者不下數十。然青筋未有如此之粗。足脂出水有之。未有出水處如鮎魚口之大。而取效亦未有如此之速。蓋此子體未破而真全。故症雖重而收功速也。數十人間有五六不能成功者。由其縱慾恣情。不守禁忌。非藥之罪也。召南昆仲。見人談醫。輒以不佞爲稱首。予笑曰。君得無到處逢人說項斯者耶。乃汪養直亦醫道中白眉。乃不收功於後。病者不忌口。過耳於養直。何尤。養直不矜己之功。亦不忤人之功。所謂忠厚長者非耶。

岩鎮鄭景南。丈病臥年餘。百治不效。昔體豐腴。今瘦骨立。飲食少進。新都名士皆辭不治。其家聞昔年方士榮孺人蠱症。時師亦皆辭去。予爲起之。因徵予治。時則六月望也。診其脈。左弦大。右關滑大。兩尺俱無。惡心。腹瘦削。狀如仰瓦。腸鳴。

如雷。晝夜不往。小水不利。肌膚及眼珠色若黃金。腹中有塊如撲。動跳不止。足膝以下皆冷。飲食不入。予詳思其病機。昔肥而今瘦者。痰也。形雖瘦而目爛。爛有神。先以五飲湯。姑試之。以觀其勢。再爲加減。因用旋覆花八分。破故紙一錢。肉桂三分。白朮、茯苓、澤瀉、陳皮、半夏各八分。生薑三片。水煎服之。二帖。惡心腸鳴皆止。次早飲食稍進。舉家欣欣色喜。令岳程鍾山公。於予爲石交。聞病有起意。心殊異之。不知爲予。因而過訪。見予撫掌大叫稱快曰。吾固知是公也。指其甥而語之。此卽所嘗與爾曹言者。聞久爲西吳縉紳遞留。不意今歸。誠吾壻之幸也。相與談對。兩日而別。別之時。景南飲食稍加。小水利。肌膚面目黃氣退。漸有生機。不虞逾半月。爲拂意事所激而怒。復吐痰。不思飲食。家人驚惶無措。亟請予診。兩寸滑大。左關弦勁搏指。右關亦滑大有力。兩尺沉微。予語之曰。病甚重。脈非前比。且不敢以萬全許。第盡吾心爾。病以藥力而同。君之福也。時爲七月之朔。予因留視七日。日進一劑。劑以人參、陳皮、半夏、茯苓、香附、白蔻仁、黃連、旋覆花、麥芽、甘草與服。服三日。惡心止。大便有稠痰下。其中間有瘀血。此皆大怒所致。故經云。怒則傷肝。甚則嘔血。并下洩上吐。亦或有紅點子在痰中吐出。

是其徵也。後改用六君子湯。加麥芽、黃連、枇杷葉、白扁豆調理。病勢駸駸向安。腹中如搢之塊亦漸消去。大僅如指耳。肌肉亦生。能下榻舉足以步。市上之人稱奇。

後聞臘月又被鬱怒。頸發癰癰。外科以藥潰。服蜈蚣敗毒藥。卒莫能收口而終。

孫文垣醫案 卷三 新都治驗

